

Widi'zh nazhon che'n Jesukrist kwa'n mizobni' San Mark

Juan xa' nililëi' men le'n nits

(Mt. 3:1-12; Lc. 3:1-9, 15-17; Jn. 1:19-28)

1 ¹Se' nguzublo widi'zh nazhon che'n Dios por Jesukrist, Me nak Xga'n Dios. ²Lo yech che'n profet Isaías, tu xa' midi'zh por Dios chi tiemp, se' nzhab:

Biwi', nzhab Dios lo Xga'n Me, dilant lol xëla tu
xa' di'zh por Lu,
par kuxkwa' xa' nez dedal.

³ Lo yuo bizh, naye di'zh xa' re' lo rë men:

“Bizuxkwa' go nez che'n Dios,
nali laka bile' go nez ro che'n Me.”

⁴Kuze' nguio Juan le'n yuo bizh, nililëi' Juan men le'n nits, nu nzhab Juan:

—Bila' go rë kwa'n gat lë' nak go, orze' goklëi' go par lu' go, walika mila' go kwa'n nak go, nes par che' Dios rë kwa'n nzë'b xki go.

⁵No rë men xa' nzë lazh men Judea, kun rë men yezh Jerusalén, ngwa bixa' lo Juan, ngwaxo'bdol bixa', orze' mililëi' Juan bixa' le'n you' Jordán. ⁶No xab Juan nakxao' yich che'n kamey, mbaino nazi' tu yid laxto' xa'; no kwa'n nzhao xa' nak rë ma nela xanch ga' no mizhin ser. ⁷No se' kidi'zh Juan widi'zh che'n Dios, nzhab Juan:


—Xa' nzadkë ticha más tsak xa' lon; no ni gat ñal da, zi' xa' da nela tu mos ga'. ⁸Na mililëi' go kun nits, per xa' nzë re' li'lëi' go kun Sprit che'n Dios.

Juan mililëi' Jesús le'n nits

(Mt. 3:13-17; Lc. 3:21-22)

⁹Le'n rë ngubizh ze' nguro' Jesús yezh Nazaret, kwa'n ña'n lo yuo che'n men Galilea, par li'lëi' Juan Me you' Jordán, ¹⁰no or nguro' Jesús le'n nits, une Jesús mixa'l lo yibë', no ngula Sprit che'n Dios yek Me nela tu palom ga'. ¹¹Lë'chi nguro' tu widi'zh lo yibë' kwa'n nzhab:

—Lu Xga'na xa' nazhi' da; nizak laxto'n por Lu.



Or ngoklëi' Jesús (Mr. 1:10)

Ngokla Mizhab ngakide Jesús

(Mt. 4:1-11; Lc. 4:1-13)

¹²Orze' tuli mbi'y Sprit che'n Dios Jesús le'n yuo bizh. ¹³Ze' nguio Me cho' ngubizh no cho' yë'l xid rë ma nazhe'b kwa'n nzho dan; ze' plo ngokla Mizhab ngakide Jesús, no lë' rë ganj che'n Dios miza' kwa'n naki'n Jesús.

Nguzublo Jesús kile' zhi'n nazhon che'n Xuz Me Dios

(Mt. 4:12-17; Lc. 4:14-15)

¹⁴No or nzho Juan lizhyi'b, nguiubre Jesús par lazh men Galilea, plo kidi'zh Me widi'zh nazhon che'n Dios par ne men xmod yo men plo nile' Dios mandad, ¹⁵nzhab Me:

—Mizhin la zhè ne men xmod gak men, men che'n Dios; kuze' bila' go rē kwa'n gat lè' nak go, no wayila go widi'zh nazhon re'.

Ngurezh Jesús primer men che'n Me

(Mt. 4:18-22; Lc. 5:1-11)

¹⁶No tu ngubizh dub nzhaded Jesús ro' lagún kwa'n ña'n lazh men Galilea, ze' une Me rop wech xa' re', Simón no Ndres; kigubi bixa' yex le'n nits par zen bixa' mbël, porke kure' zhi'n che'n bixa', ¹⁷orze' nzhab Jesús:

—Di'kë go ticha, porke dizde nal, len, lè' go kan men lugar di mbël.

¹⁸No tuli nzhakë bixa' tich Jesús or mbin bixa' kure', mila' bixa' yex che'n bixa'. ¹⁹No xche'p dilant ze' une Jesús Jakob xga'n Zebedeo, no wech xa' Juan, rop xa' re' nzob le'n bark, kizuxkwa' bixa' yex che'n bixa', ²⁰orze' tuli ngurezh Jesús bixa', mila' bixa' Zebedeo xuz bixa' le'n bark kun rē mos che'n xa', no lè' bixa' nzhakë tich Jesús.



Ngurezh Jesús Jakob no Jwan (Mr. 1:20)

Tu miyi' nzho tu mbi mal laxto'

(Lc. 4:31-37)

²¹Or mizhin bixa' yezh Capernaúm, zhè kwa'n nayi' kè rē men Israel zhi'n, nguio Jesús le'n yo' plo nitse'd bixa' widi'zh che'n Dios, orze' nguzublo kilu' Me widi'zh che'n Dios lo rē men nzhin ze'. ²²Xe mia'n rē men ze' tuli por kwa'n kilu' Jesús, porke kidi'zh Me nela men nile' ka mandad ga', no tlēt' nela rē men xa' nilu' leye. ²³Lè'chi ze' nzo tu miyi', nzho tu mbi mal laxto', naye nguru'zhiè miyi' re', nzhab xa':

²⁴—¿Kwan nizakal kun no, Jesús kwa'n nzè Nazaret? ¿Chi nzèl par lo'xal no? ¡Na nane ka cho lu, Lu nak xa' Nazhon che'n Dios!

²⁵Orze' nzhab Jesús:

—¡Kiex, bitsao' ro'l, no guro' laxto' miyi' re'!

²⁶Orze' mile' mbi mal ze' mikao miyi' re', no nguru'zhyèi naye, orze' nguro'tine. ²⁷Rē men xe mia'n por kwa'n ngok re', mbaino kidi'zh bixa':

—¿Kwan kure'? Kwa'n mile' xa' ba' nilu', lè' xa' nak tu xa' walika nile' mandad, porke, ¡haxta nu rē mbi mal nzhon ro' xa'!

²⁸Orze' nayan laka nguxo'b di'zh, rē kwa'n nile' Me, rē yezh kwa'n nzhin naka'n lazh men Galilea.

Miliyak Jesús xna'zha'p Simón

(Mt. 8:14-15; Lc. 4:38-39)

²⁹No or nguro' Me le'n yo' plo nitse'd men widi'zh che'n Dios, tuli nzha Me par lizh Simón plo nak ska lizh Ndres, no Jakob kun Juan nzha kun lè' Me. ³⁰No lè' xa'zha'p Simón nax kun xlè', orze' lwegaa' nzhab bixa'i lo Jesús. ³¹Orze' nguzubi Jesús, nguzen Me ya' xa' una' re' par ngwaxche xa', orze' tuli nguro' xlè' xa', mbaino lè' xa' miza' kwa'n ndao rē xa' re'.

Miliyak Jesús nayax men nzhakne

(Mt. 8:16-17; Lc. 4:40-41)

³²No mizhèl la lyuo ngwa'z la ngubizh, rē xa' yezh ze' ngwanu rē men nzhakne, no rē xa' kwa'n nzho mbi mal laxto' lo Jesús par yak bixa'. ³³Rē bixa' migwa' ro' yo' plo nzo Jesús, ³⁴orze' miliyak Jesús nayax rē xa' nizak rē lo yalyizh,

no ngulo' Me mbi mal laxto' nayax men, per nangala't Jesús ngadi'zh rè mbi ze', porke nzhakbe'i cho nak Jesús.

Milu' Jesús widi'zh che'n Dios lo rè men yezh Galilea

(Lc. 4:42-44)

³⁵No xtu riyè'l, garzi'l laka, nakao ra'; nguro' Jesús par nzhadi'zh Me tu lad lo Dios plo yent cho nak. ³⁶No Simón kun rè xa' nzo kun lè' xa', nzhakwa'n bixa' Jesús, ³⁷no or une bixa' plo nzo Me, nzhab bixa' lo Me:

—Rè men re' kizikwa'n go.

³⁸Orze' nzhab Jesús:

—Cha'o nzha be rè yezh kwa'n ña'n gax re', par dizha widi'zh nazhon che'n Dios rè ze'; par kuze' ka nzhala re'.

³⁹Orze' nkizè Jesús rè yezh kwa'n ña'n lazh men Galilea, par ngwalu' Me widi'zh che'n Dios le'n rè yo' plo nitse'd men widi'zh che'n Dios, mbaino ngulo' Me rè mbi mal laxto' rè men.

**Miliyak Jesús tu men xa' nizak yalyizh
kwa'n lè lepra**

(Mt. 8:1-4; Lc. 5:12-16)

⁴⁰No ze' nguzubi tu men lo Jesús, xa' re' nizak yalyizh kwa'n lè lepra, no nguzuxib xa' re' par mina'b xa' lo Jesús, nzhab xa':

—Chi lè'o nzhaklai, gak liyak go da.

⁴¹Dox milats laxto' Jesús xa' re', orze' migal Me xa', mbaino nzhab Me:

—Nzhaklan yakal; lè'l miakla.

⁴²No tuli mitlo yalyizh ze', mimbe xa'. ⁴³No ngulunez Jesús xa', per dox nzhab Me lo xa':

⁴⁴—Biwi', yent cho lo gable, nab tsa wa lo ngulèi' par ne xa'i, no biza' gon kwa'n nzobni' lo ley kwa'n mila' Dios lo Muisés por yalyizh che'nal kwa'n miak ba', par gon xtu mene.

⁴⁵Per miyi' re', laore nguro' xa' nez, tuli ka mixo'bdi'zh xa'i, orze' rè plo mire'che, kuze' nangaktra' ngayo Jesús rè yezh dub niwi' men. Por kuba' mia'n Me plo yent cho nak, per ni kun ter, rè plo nguro' men, nzha bixa' lo Jesús.

Miliyak Jesús tu xa' nagakt win

(Mt. 9:1-8; Lc. 5:17-26)

2 ¹Nded pla ngubizh, nguiubre Jesús xtu wëlt yezh Capernaúm, no mbin rë men lë' Jesús nzho la yo', ²orze' lwegá' dox men migan ze', haxta yentra' plo kwín bixá', haxta ni ro' yo' nagaktra' kwín bixá'; mbaino midí'zh Jesús widí'zh che'n Dios lo bixá'. ³Ze' mizhinu tap miyí' tu men nzhakne, tu xa' nagakt win. ⁴No por nagakt yo bixá' plo nzo Jesús por tanta men, kuze' nkili bixá' yek yo' par michil bixá'i par ngok mila bixá' miyí' re' nali laka plo nzo Jesús dub nax xa' lo kwa'n. ⁵Or une Jesús dox ñila bixá' Me, kuze' nzháb Jesús lo xa' nagakt win re':

—Xga'na, lë' rë kwa'n nzë'b xkil mizhe' la lo Dios.

⁶Per ze' nzob pla rë xa' nilu' ley, mile' bixá' xigab: ⁷“¿Chon midí'zh xa' ba' sa'? ¡Midí'zh xa' kwa'n nayi' par lo Dios, porke yent cho men gak che' kwa'n nzë'b xki xtu men! ¡Nabtsa Dios gak le'i!” ⁸No lwegá' ngwanu laxto' Jesús cho xigab kile' bixá', kuze' nzháb Jesús lo bixá':

—¿Chon kile' go xigab sa' le'n laxto' go? ⁹¿Kwan más jwals gapa lo xa' nzhakne rë? ¿Chi gapa: “Rë kwa'n nzë'b xkil, mizhe' la lo Dios”, o gapa: “Waxche, gulits kwa'n naxal lo, no guzë”?” ¹⁰Nal par ne go, na nak Xga'n Dios mbaino nak da tu men yizhyuo, no mile' Dios mandad da par che'n rë kwa'n nzë'b xki men lo Dios —kuze' nzháb Jesús lo xa' nagakt win re'—, ¹¹lol nin, waxche, gulits kwa'n ngo'tal lo, bizë lizhal.

¹²Orze' tuli ngwaxche miyí' re', no ngulits xa' kwa'n ngo't xa' lo, no ña xa', xe niwi' rë men nzhin ze', mbaino kidi'zh bixá': “¡Dox nazhon Dios!” No nzháb bixá': “¡Lalta' gat ne be tu kure!”

Jesús ngule Leví par gak xa' men che'n Me

(Mt. 9:9-13; Lc. 5:27-32)

¹³Orze' nguro' Jesús par ngwa Me xtu wëlt, ro' lagún kwa'n ña'n lazh men Galilea; orze' migan tu béd men lo Jesús, no ze' nguzublo kilu' Me widí'zh che'n Dios lo bixá'. ¹⁴No or nzhaded Me ze', une Me Leví xga'n Alfeo nzob plo nzhax dimi che'n gobier Roma. Orze' nzháb Jesús lo xa':

—Dí'kë ticha.

Lë'chi tuli nzhakë xa' tich Jesús.

**Jesús milu' chon nzhao Me kun rë xa'
gat nzhont ley che'n Muisés**

¹⁵Uzhëla di orze', nzhob Jesús lo mes lizh Leví, kiyao Me kun nayax xa' nikan dimi che'n gobier Roma, no kun rë xa' gat nzhont ley; kiyao rë bixa' kun Jesús mbaino kun rë men che'n Me, no dox la nayax xa' nzhakë tich Jesús nzhin ze'. ¹⁶Per or une rë men nilu' ley kun rë men fariseo, lë' Jesús kiyao kun rë xa' gat nzhont ley no kun rë xa' nikan dimi che'n gobier Roma, orze' nzhab bixa' lo rë men che'n Jesús:

—¿Chon kiyao xa' nitse'd go, kun rë men gat nzhont ley che'n Dios, mbaino kun rë xa' nikan dimi che'n gobier Roma?

¹⁷Or mbin Jesús kure', nzhab Me:

—Rë xa' wen, gat naki'nt xa' doctor; sino ke nab tsa xa' nzhakne naki'n doctor; porke nangaxë'lt Dios da lo rë men yent kwan nak lo Dios; Dios mixë'l da lo rë men xa' nzë'b xki lo Dios.

**Jesús milu' xmod zo men xlats men or na'b
men lo Dios**

(Mt. 9:14-17; Lc. 5:33-39)

¹⁸No ngol tu ngubizh nzo xlats pla rë men che'n Juan xa' nili'lëi' men le'n nits, no pla rë men fariseo, par kina'b bixa' lo Dios, kuze' ngwa pla rë xa' plo nzo Jesús, mina'bdi'zh bixa' lo Me, nzhab bixa':

—Rë men che'n Juan mbaino rë men che'n rë xa' fariseo nizo bixa' xlats bixa' or nina'b bixa' lo Dios, per rë men che'nalse, gat nizot bixa' xlats bixa'.

¹⁹Orze' nzhab Jesús:

—¿Taxa plo gon go, zo men xlats men lo jwandang, dub nzo xa' disposad ze'? ²⁰Per or yalo jwandang or bi disposad, orze'se lë' bixa' zo xlats. ²¹Yent cho kë' rremiend tu bistid go'x kun tlë' lar kub, porke lë' lar kub nido'p no nichëze bistid go'x, orze' más nakap nzhake. ²²No yent cho ko vin nax le'n tu pump go'x, porke lë'i chëz pump go'x, orze' zu't rope. Más wen ko men vin nax le'n pump kub.

Jesús nile' mandad zhë kwa'n nayi' kë men Israel zhi'n

(Mt. 12:1-8; Lc. 6:1-5)

²³Tu ngubizh nzhaded Jesús tu plo nzhi'b triu, zhë kwa'n nayi' kë men Israel zhi'n. Orze', nguzublo rë men che'n Me kikib do che'ne, no kiyao bixa'i. ²⁴no ze' nzhin pla men fariseo, nzhab lo Jesús:

—Biwi', ¿chon kile' rë men che'nal kuba', zhë kwa'n nayi' kë men Israel zhi'n?

²⁵Per nzhab Jesús:

—¿Taxa, chi nagat go'l go kwa'n mile' Dabi tu wëlt, lë' xa' no rë men che'n xa', or niyent kwa'n gao bixa' no dox nila'n bixa'? ²⁶Orze' miye laxto' xa' nguio xa' le'n yo' che'n Dios or nak Abiatar ngulëi' ro; ndao xa' pan kwa'n nab tsa ngulëi' nzhak nzhao; no nu rë men che'n xa' miza' xa'i ndao.

²⁷No nu nzhab Jesús:

—Zhë kwa'n nile' men diskans; Dios nguloi par ya men wen, no nangagot Diose par zakzi men por nile' xa' be's xigab. ²⁸Kuze', na, Xga'n Dios, mbaino nak ska da tu men yizhyuo, no na nile' mandad zhë re'.

Miliyak Jesús tu men mibizh ya'

(Mt. 12:9-14; Lc. 6:6-11)

3 ¹No xtu wëlt nguio Jesús le'n yo' plo nitse'd men widi'zh che'n Dios; no ze' nzo tu miyi' xa' mibizh ya'. ²Xe kila'ch bixa' par nabei chi lë' Jesús liyak miyi' ze' zhë re', nes par gak kë' bixa' kixu' Jesús lo rë xa' nak zhi'n. ³Orze' nzhab Jesús lo miyi' xa' mibizh ya' re':

—Watso, guzo garol sao' rë.

⁴Mbaino nzhab Jesús lo rë más xa' nzhin ze':

—¿Kwan nzhab ley che'n Muisés gak le' met, zhë kwa'n nayi' kë men Israel zhi'n? ¿Chi tu kwa'n wene o tu kwa'n nakape? ¿Chi gaknu be tu men par nagat xa', o la' be gat xa'?

Per yent cho ngakab, xe mia'n bixa'. ⁵Lë'chi miëk Jesús nayi', miwi' Me lo rë men nzhin naka'n ze', mbaino miwin laxto' Me por tanta mal laxto' bixa'; orze' nzhab Me lo miyi' ze':

—Bitsiga' ya'l.

No mitsiga' miy'i'y, mbaino uni wene, ⁶per or nguro' rē men fariseo al tich, orze' midi'zh bixa' kun rē men che'n Herodes, par xmod gut bixa' Jesús.

Tu bēd men nzhakē tich Jesús

⁷Orze' nguiubchi Jesús kun rē men che'n Me, par nzha Me ro' lagún kwa'n ña'n lo yuo che'n men Galilea. No nayax men Galilea, mbaino tu bēd men xa' nzē lazh men Judea, nzhakē bixa' tich Jesús. ⁸No nu rē xa' nzē Jerusalén, kun rē xa' nzē lazh men Idumea, kun más rē xa' nzē xtu ro' you' Jordán, no haxta rē xa' nzē naka'n plo ña'n yezh Tiro no Sidón; rē men re' miza plo nzo Jesús, par gon bixa' rē kwa'n nile' Me. ⁹Kuze' mile' Jesús mandad rē men che'n Me, par list y'i'dnu bixa' tu bark, por tanta men, par nakotip men Me, ¹⁰porke dox men miliyak Jesús, kuze' rē xa' nzhakne nila' kobi bixa' Jesús par gal bixa' ta' Jesús. ¹¹Mbaino rē men xa' nzho mbi mal laxto' re', or une bixa' Jesús, ngo't kuslo bixa' lo Me, orze' nguruzhiē bixa', nzhab bixa': “¡Lu nak Xga'n Dios!” ¹²Per mile' Jesús mandad nadi'zhtra' bixa' cho nak Me lo rē men.

**Ngule Jesús tu dusen men che'n Me,
rē xa' le' mandad nela lē' Me
(Mt. 10:1-4; Lc. 6:12-16)**

¹³Orze' nkili Jesús yek tu lom, dizde ze' ngurezh Me cho xa' gak men che'n Me, orze' nguzubi bixa' lo Me. ¹⁴Xid rē xa' ze' ngule Me tu dusen xa' kizē kun lē' Me, no par xē'l Me bixa', yadi'zh bixa' widi'zh che'n Dios lo rē men, ¹⁵mbaino par le' bixa' mandad, ro' rē mbi mal laxto' rē men. ¹⁶No dub tu dusen bixa' lē se': Simón, xa' nzhab Jesús lē Per; ¹⁷no rop wech Jakob kun Juan, xga'n Zebedeo, xa' kwa'n ngulu'lē Jesús, Boanerges (widi'zh re' gab: Xga'n nguzi'); ¹⁸no Ndrés, mbaino Lip, no Bartol, no Mateo, mbaino Max, no xtu Jakob xga'n Alfeo, kun Tadeo, mbaino Simón xa' nzē xid men Kananist, ¹⁹no nu Judas Iscariote, xa' chi Jesús lo rē men xa' gut Me.

**Nzhab men, lē' Jesús nile' rē kwa'n por Mizhab
(Mt. 12:22-32; Lc. 11:14-23; 12:10)**

²⁰Or mizhin Jesús le'n tu yo' kun rē men che'n Me, orze' dox men migan xtu wēlt plo nzo Me, no por tanta men,

haxta ni nangakt ngao Me kun rë men che'n Me. ²¹Or mbin rë melizh Jesús kure', orze' ngokla bixa' ngazen bixa' Jesús, porke mile' bixa' xigab, pas nzhak miyizh xa' re'. ²²No nzë pla xa' dizde Jerusalén, xa' nilu' ley kwa'n mila' Dios lo Muisés, nzhab bixa':

—Lë' Beelzebú, mizhab xa' nile' mandad lo rë mbi mal, nile' nigo' miyi' re', rë mbi mal laxto' rë men.

²³Orze' ngurezh Jesús rë xa' nilu' ley ze', par midi'zh Me kun kwent lo bixa', nes par zobyek bixa'i, nzhab Me:

—¿Xmod ko' Mizhab, xtu tsa' mbi mal xa', laxto' men?

²⁴Chi tu yezh men nidil kun mis rë men che'n xa', orze' lë' bixa' lox. ²⁵No chi dil mis men nzho tutsa yo', tu xa' kun xtu xa', lë' bixa' lox. ²⁶No chi dil Mizhab kun mis rë mbi mal che'n xa', lë' bixa' lox; orze' yentra' kwan gak le' xa'. ²⁷No lizh tu miyi' xa' dox nzhak nidil, nagakt yo men par li'wa'n men rë kwa'n kinu xa'. Par gak liwa'n men che'n xa', naki'n galo laka li'b xa'. ²⁸Walika kwa'n nin lo go re': Rë kwa'n gat lë' nile' men lo Dios, no rë kwa'n gat lë' nidi'zh men por Dios; rëi che' Dios. ²⁹Per xa' nidi'zh gat lë' por Sprit che'n Dios, nayotra' zhe' che'n xa', lë' xa' nzë'b xki lo Dios par dubta'.

³⁰Kure' nzhab Jesús, porke lë' bixa' nidi'zh: “Lë' Jesús kinu mbi che'n Mizhab.”

Xna' Jesús no rë wech Me

(Mt. 12:46-50; Lc. 8:19-21)

³¹Orze' mizhin xna' Jesús kun rë wech Me, al tich nzo bixa', orze' mixë'l bixa' gavis ya Jesús lo bixa'. ³²No dub kidi'zh Jesús lo rë xa' nzhin naka'n lo Me, lë'chi nzhab tu rë xa' ze':

—Lë'o; lë' xna' go no rë wech go, nzhin al tich; lë' bixa' kibezh go.

³³Orze' mikab Jesús:

—¿Cho xa' nak xna'n, no rë wecha?

³⁴Orze' miëk Me lo rë men nzhin naka'n ze', no nzhab Me:

—Rë xa' re' nak xna'n, no rë wecha, ³⁵porke rë xa' nile' kwa'n nzhakla Dios; xa' ze' nak wecha, no bizana, mbaino xna'n.

Kwent che'n xa' nzha'n triu

(Mt. 13:1-9; Lc. 8:4-8)

4 ¹Xtu wëlt nguzublo kilu' Jesús widi'zh che'n Dios lo rë men, ro' lagún kwa'n ña'n lazh men Galilea. Ze' dox men migan plo nzo Jesús, orze' nkë Me le'n tu bark par ña Me xche'p al le'n nits. Orze' nguzob Me, no lë' rë men nzhin ro' nits. ²Orze' nguzublo Jesús, milu' Me nayax kwa'n lo bixa' kun pura kwent. Kuze' miza' Me kwent re', nzhab Me:

³—Bin go kure'. Nguro' tu xa' nzhaya'n lazh triu nzhache'ch xa'i. ⁴Or ngo'n xa'i, che'pe ngob le'n nez, ngula miyin loi ndao mai. ⁵No xche'pe ngob lo yuo ke, no por niyen be's yuo ze', lwega' ngulene. ⁶Per or ngulen ngubizh, migo'le; no por gat kinui be's luch, mibizhe. ⁷No xche'pe ngob xid ya yich; no or miro'b rë ya yich re', nangala't rë kure' ngaro'be, kuze' nangaza'te. ⁸Per máse ngob lo yuo wen, miro'be no miaxe; orze' dox miza'i. Nzhoi miza' gal bichi' lazhe, nzhoi miza' chon gal lazhe; mbaino nzhoi miza' haxta tu gayo' lazhe.



Tu miyi' kigo ben (Mr. 4:3)

⁹Orze' nzhab Jesús:
—Go kinu nzha par gone, bin goi.

¿Chon midi'zh Jesús kure'?

(Mt. 13:10-17; Lc. 8:9-10)

¹⁰Or mia'n nab Jesús, rë xa' nzhin naka'n lo Me, kun za tu dusen men che'n Me xa' más nile' mandad, mina'bdi'zh bixa' lo Me, nzhab bixa':

—¿Kwan gab kwent kwa'n midi'zh go ba'?

¹¹Orze' nzhab Jesús:

—Lo go nin rē kwa'n naga'ch che'n Dios kwa'n kinu Me plo nile' Me mandad; per lo rē xa' nzo al tich, kun pura kwent nilune lo bixa', ¹²porke,

Ter une bixa'i, per yent cho xigab ngale' bixa'

por lē'i;

no ter mbin bixa'i, per nangazobyekt bixa'i.

Kuze' nangala't bixa' rē kwa'n gat lē' nak bixa',

mbaino nangache't Dios rē kwa'n nzē'b xki

bixa' lo Me.

Jesús midi'zh xmod nak kwent che'n men nzha'n triu

(Mt. 13:18-23; Lc. 8:11-15)

¹³Orze' nzhab Jesús:

—¿Chi lē' go nangazob yekt kwent re'? Orze', ¿xmod zob yek go más kwa'n? ¹⁴Men xa' nzha'n ze' nak xa' nidi'zh widi'zh che'n Dios. ¹⁵No yuo le'n nez nak xa' mbin widi'zh che'n Dios, per por nangayilat xa'i, orze' Iwega' ngwa Mizhab, mizubchi widi'zh che'n Dios kwa'n nzho laxto' xa'. ¹⁶No yuo ke nak xa' mbin widi'zh che'n Dios, dub nizak laxto' xa', ¹⁷per por gat ña laxto' xa' kun rē che'n Dios, kuze' or nizak xa' tu kwa'n, o nidi'zh men tich xa' por widi'zh che'n Dios, orze' nila' xa' Dios. ¹⁸No yuo plo nzhi'b ya yich nak xa' nzhon widi'zh che'n Dios, ¹⁹per por dox nile' xa' xigab por kwa'n naki'n xa', no por niwix xa' gap xa' máse, mbaino por más rē kwa'n nizē'bla xa'; kuze' yent cho kwent nak xa' men che'n Dios. ²⁰Per yuo wen nak xa' nzhon widi'zh che'n Dios, no nile' xa' kwa'n nzhab Dios; no por mod niban xa', nak xa' nela yuo kwa'n miza' tu yalgo'n ro, nzhoi miza' gal bichi'y, nzhoi miza' chon gale, mbaino nzhoi miza' haxta tu gayo' lazhe.

Kwent che'n tu ki

(Lc. 8:16-18)

²¹Nu nzhab Jesús:

—Yent cho tu men tsinki tu biani, orze' zob xa'i xan tu kaj o xan tu lo'n. Gat lē' xa' zobe al ya par ziniy dub le'n yo', ²²porke rē kwa'n naga'ch nilun lo go, lē'i xo'bdí'zh go lo men. ²³Cho go nzhakla gon kwa'n nin, bizobyek goi.

²⁴Mbaino nzhab Jesús:

—No bizobyek go kwa'n nin re': Chi lē' go gone, orze' más kwa'n gak zobyek go, ²⁵porke xa' nile' kwa'n nzhapa,

ngubizh kun ngubizh más kwa'n zobyek xa'; per xa' gat nile' kwa'n nzhaba, haxta rē kwa'n mbin xa' midizha, yubchi lo xa'.

Kwent che'n lazh tu kwa'n nixē'n men

²⁶Mbaino nu nzhab Jesús:

—Plo nile' Dios mandad nak nela tu miyi' kwa'n ngo'n lazh triu lo yuo che'n. ²⁷Ño xa' nzha' xa' no ñaxche xa'; mbaino ngaza't xa' kwent xmod ngulene no miro'b lazh kwa'n mixē'n xa' ze'. ²⁸Lē' yuo nile' nilene, orze' niru'xo'b lai, no niru'xo'b doi, orze' niza'i lazhe. ²⁹Mbaino or ngwagale miza'i lazhe, orze' lē' men ngo'ne, lwegā' nilits xa' rē kwa'n miza'i, porke ngol la tiemp yatse.

Kwent che'n tu lazh mostás

(Mt. 13:31-32; Lc. 13:18-19)

³⁰Orze' nzhab Jesús:

—¿Kun kwan tutsa nak plo nile' Dios mandad?, o, ¿kun kwan chē'l lal bei, par ne be xmod nake? ³¹Nake nela tu lazh mostás kwa'n mixē'n tu men lo yuo che'n, ter nake tu lazh kwa'n más kwa'n win, lo rē lazh kwa'n nzho yizhyuo. ³²Per or mixē'n xa'i, orze' miro'be, haxta ngoke tu ya más kwa'ro xid rē ya nayē' kwa'n nzhi'b ze', haxta miyin michao' yo che'n lo rē rram che'ne.

¿Chon nilu' Jesús widi'zh che'n Dios kun kwent lo rē men?

(Mt. 13:34-35)

³³Kun nayaxra' kwent milu' Jesús widi'zh che'n Dios lo rē men, par ne bixa' xmod nile' Dios kun rē men yizhyuo, haxta plo ngwazha bixa' mbin bixa'i. ³⁴Kun pura kwenttsa nilu' Jesús widi'zh che'n Dios lo rē men, per nab tsa lo rē men che'n Me, nzhab Me kwan nzhab kad kwent.

Mikwē'z Jesús tu yiwbi

(Mt. 8:23-27; Lc. 8:22-25)

³⁵No or nzhalā la yē'l, nzhab Jesús lo rē men che'n Me:

—Cha' go nzha be xtu ro' nits ba'.

³⁶Orze' mia'n rē men nzhin ze', mbaino lē' rē men che'n Jesús ña bixa' le'n bark plo nzob la Jesús; no nu más rē bark

che'n xtu ben men, ñakë tich Jesús. ³⁷Dub nzha bixa' le'n bark, lë'chi tu yiwbi dox nguro'; no por tanta niwin nits, haxta nguioi le'n bark no nzhaya'z yo'i le'n nits. ³⁸No lë' Jesús naxnaa al xan bark, nako' Me lo tu almad. Lë'chi milixche bixa' Me, nzhab bixa':

—¡Maestr! ¿Chi yent kwan ña laxto'l, lë'be gat le'n nits?

³⁹Orze' ngwaxche Jesús, mikwë'z Me mbi, no nzhab Me lo nits:

—¡Nawintra'! ¡Xe gulëz!

Orze' tuli ngulëz mbi, no rëi mia'n xe. ⁴⁰Orze' nzhab Me lo rë men che'n Me:

—¿Chon dox nizheb go? ¿Chon naga yila go Dios?

⁴¹Orze' dox mizheb bixa', no nzhab bixa' lo wech bixa':

—¿Cho xa' re'? ¡Haxta mbi no nits nzhon ro' xa'!

Tu miyi' nzhak miyizh nzho Gadara

(Mt. 8:28-34; Lc. 8:26-39)

5 ¹Or mizhin bixa' xtu ro' lagún kwa'n ña'n lazh men Gadara, ²laore ngula Jesús bark, tuli nguzubi tu miyi' nzhak miyizh lo Me, zilita' nzho xa' re' le'n panteón no dox nzho mbi mal laxto' xa'. ³Mbaino yent cho le' gan li'bdo' xa', ni kun kaden, ⁴porke nayax wëlt mili'b ni' xa' kun kaden; no rë wëlt micho' xa'i, kuze' yent cho xek lo xa'. ⁵Zhëy-yë'le nikizë xa' le'n panteón no le'n mont, mbaino nibizhyë xa', no nikë' xa' ke ta' xa'. ⁶Per or une miyi' re' Jesús zitra', karre nguzubi xa' no nguzuxib xa' lo Me, ⁷no naye nguru'zhië xa', nzhab xa':

—¡Yent kwan nizaka kun lu, Jesús Xga'n Dios, Me nzho lo yibë'! ¡Kina'ba lol por Dios, nazakzital da!

⁸Sa' midi'zh xa' por rë mbi mal kwa'n nzho laxto' xa', porke lë' Jesús kiyab lo xa':

—¡Mbi mal, guro' laxto' miyi' re'!

⁹Mbaino nu mina'bdi'zh Jesús lo mbi mal ze':

—¿Xmod lël? —nzhab Jesús.

Orze' mikab mbi mal ze':

—Na lë legión, porke dox nayax no.

¹⁰No nu dox kina'b rë mbi mal re' lo Jesús, par naxë'l Me rë mbi re' xtu lazh men. ¹¹No gax laka ze', ta' tu lom; nzhin tu

bëd kuch, kiyao ma, ¹²no dox kina'b rë mbi mal ze' lo Jesús par ziyël Jesús biy laxto' rë kuch kwa'n nzhin ze'. ¹³Orze' nguziyël Jesús, nguro' rë mbi mal ze' par ñai laxto' rë kuch ze', pas como tu chop mil ma; le'chi nguzublo mikë' rë bima karre yek tu lom par ngob bima haxta le'n barrank plo nzho nits; ze' ngut bima.

¹⁴Or une rë xa' nikina kuch ze'i, karre ña bixa' par ngwayab bixa'i lo rë men yezh, mbaino lo rë men nzho dan. Orze', rë men ngwatswi' kwan ngok ze'. ¹⁵Or mizhin bixa' lo Jesús, une bixa' xa' ngok miyizh ze', nzob la xa' no nak la xa' lar, no menaye la nilu' xa'; no xa' re', xa' nguio mbi mal laxto'; orze' rë men mizheb. ¹⁶No rë xa' une kwa'n ngok kun xa' ngok miyizh re', mbaino kwa'n ngok kun rë kuch nzhin ze', kidi'zh bixa'i lo más rë men, ¹⁷orze'



Miliwen Jesús tu miyi' dox nzho mbi mal laxto' (Mr. 5:15)

nguzublo dox kina'b bixa' lo Jesús, par yubchi Jesús lo yuo che'n bixa'. ¹⁸Or nzhakë Jesús le'n bark par bi Me, mbaino lë' miyi' kwa'n ngok miyizh ze', dox kina'b miyi' par ngakë miyi' tich Jesús, ¹⁹per nangaziyëlt Jesús, sino ke nzhab Jesús:

—Bizë lo rë men lizhal, no guzh rë kwa'n mile' Dios por lu, no xmod milats laxto' Diosal.

²⁰Orze' ña miyi' ze', no nguzublo kiyab miyi'y lo rë men kwa'n nzho rë yezh kwa'n ña'n lazh men Decápolis, kwa'n mile' Jesús por lë' xa'. No rë men niwi' lo miyi' re', xe mia'n bixa' tuli.

Xcha'p Jairo no tu una' xa' migal xab Jesús

(Mt. 9:18-26; Lc. 8:40-56)

²¹Or nguiubre Jesús kun bark xtu wëlt, al xtu ro' nits, ze' migán tu bëd men naka'n lo Jesús, ro' nits plo ngula Me bark ze'. ²²Ze' mizhin tu xa' lë Jairo, xa' nile' mandad le'n yo' plo

nitse'd men widi'zh che'n Dios. Or une xa' Jesús, tuli nguzuxib xa' lo Me, ²³mbaino dox nalats midí'zh xa' or kina'b xa' lo Jesús, nzhab xa':

—Lè' xcha'pa naxiat la; cha'o par xo'b go ya' go yek xcha'pa, par yak xcha'pa no par ban una'.

²⁴Orze' nguziyèl Jesús nzha bixa', no nu tu béd men nzhakè, haxta kiche'p guchin bixa'. ²⁵No xid rè men re', nzho tu una' nzhakne, nizak xa' kwa'n, nzhala tu dusen li'n. ²⁶No dox la nguzakzi xa' por kwa'n mile' nayax doctor kun lè' xa', no ni kon ter milo'x xa' rè kwa'n kinu xa'; per yent kwa'n ngazu'i, lè'la más mixo' xa'. ²⁷Or mbin xa', rè kwa'n nile' Jesús, orze' nguzubi xa' al tich Jesús, xid rè men ze', par migal xa' xab Me, ²⁸porke mile' xa' xigab: “Namás gala xab xa' re', lè'da yak ka.” ²⁹No tuli ngulèz kwa'n nizak una' no mize'n una' lè' una' miak la. ³⁰Per lwegá, mizi Jesús, lè' yalnazon kwa'n kinu Me, miliyak tu men. Orze' mièk Me lo rè men, nzhab Me:

—¿Cho migal xaba?

³¹Orze' nzhab rè men che'n Me:

—Lè' go nane ka, dox men kiche'p go rè lad, no kinabdi'zh go, ¿cho migal go?

³²Per Jesús xe kiwi' Me naka'n, par ne Me, cho men migal ta' Me. ³³Orze' dox nizheb una' haxta nizhiz una', no por mizi una' lè' una' miak, orze' nguzubi una' no nguzuxib una' lo Jesús, mbaino mixè'lro' una' rëi. ³⁴Orze' nzhab Jesús:

—Xcha'p, por ngwayilal da, miakal. Bizè, nale'tra'l xigab.

³⁵Stubi kidi'zh Jesús kun lè' una' re', lè'chi mizhin pla xa' nguro' lizh Jairo, nzhab xa' lo Jairo:

—Lè' xcha'pal ngut la; bila' nalicha'btra'l Maestr.

³⁶Or mbin Jesús widi'zh re', lwegá' nzhab Me lo Jairo:

—Nazhebtal, wayila da namás.

³⁷No nangaziyèltra' Jesús nga más men lizh Jairo; nab tsa Per, no Jakob, mbaino Juan wech Jakob nzha kun lè' Me. ³⁸Or mizhin bixa' lizh Jairo, une Jesús dox nazhe'b kile' men, kibizhiè bixa', kiyo'n bixa'. ³⁹Or nguio Jesús, nzhab Me:

—¿Chon dox nazhe'b kile' go, kiyo'n go? Lè' mizhwin re', gat lè'ta' ngut mizhwin; ka naxnaa mizhwin.

⁴⁰Orze' mixizhnu men Jesús, per Jesús mile' nguro' rè men, orze' mbi'y Me nab tsa rop xa' nak xine re', no kun yon

men che'n Jesús, nguio bixa' plo nax mizhwin ngut re'. ⁴¹Orze' nguzen Jesús ya' mizhwin, no nzhab Me:

—¡Talita kumi! (Widi'zh rè gab: Mizhwin, lè'da kini lol: “¡Waxche!”)

⁴²Orze' tuli ngwaxche mizhwin kwa'n nzhap tu dusen li'n re', no nguzublo nguzè mizhwin, no rè men une kure', xe mia'n bixa' tuli. ⁴³Orze' mile' Jesús mandad, yent cho lo gab bixa' kure'; no nzhab Me, za' bixa' kwa'n gao mizhwin re'.

Nguiubre Jesús yezh Nazaret, plo mixen Me

(Mt. 13:53-58; Lc. 4:16-30)

6 ¹Orze' nguro' Jesús ze' par ngwa Me yezh Nazaret plo mixen Me, no rè men che'n Me nzhakè tich Me. ²Or ngol zhè kwa'n nayi' kè men Israel zhi'n, orze' ngwalu' Jesús widi'zh che'n Dios le'n yo' plo nitse'd bixa' widi'zh che'n Dios. No rè xa' mbin kwa'n midi'zh Me, xe mia'n bixa' tuli por xmod nilu' Jesús widi'zh che'n Dios, orze' nzhab bixa' lo wech bixa':

—¿Plo ngwatse'd xa' re', dox kwa'n nzhak xa'? ¿Plo ngwatse'd xa' rè kwa'n nzhak xa' re', no rè kwa'n nazhon nile' xa'? ³¿Per chi gat lè't xa' re' karpinter, xga'n Mari; no wech Jakob, no Che, no Judas, mbaino Simón? No, ¿chi gat lè't rè bizan xa' re', nzo kun be?

Kuze', nangayilat bixa' Me. ⁴Orze' nzhab Jesús:

—Rè plo ñila men tu profet, xa' nidi'zh por Dios. Nabtsa rè men lazh xa', no rè melizh xa', mbaino rè xa' nzhin kun lè' xa' gat ñilat xa'.

⁵Nangakt ngale' Jesús nayax zhi'n nazhon lazh Me. Nabtsa pla men nzhakne miliyak Me or mixo'b Me ya' Me yek bixa'.

⁶No xe mia'n Jesús por tanta nad rè men lazh Me, par yila bixa' Jesús. No nkizè Jesús naka'n rè yezh win kwa'n nzhin ze', par milu' Me widi'zh che'n Dios.

Mixè'l Jesús tu dusen men che'n Me par yalu' bixa' widi'zh che'n Dios

(Mt. 10:5-15; Lc. 9:1-6)

⁷Orze' ngurezh Me dub tu dusen men che'n Me, par mixè'l Me bixa' kad yezh, chop ga bixa'; no miza' Me yalnazon ka' bixa' par ko' bixa' mbi mal laxto' rè men. ⁸orze' mile' Me mandad, yent kwa'n wei' bixa' nez; nab tsa tu bordón; no ni

nawei' bixa' kwa'n gao bixa', no ni tu bols, no ni dimi; ⁹no ni nawei' bixa' xtu nez yalyid, no ni xtu nez lar. ¹⁰No nzhab Me:

—Wanei plo zhin go lizh tu men, biya'n go ze' haxta or ya go xtu yezh. ¹¹No wanei cho yezh plo naziyël bixa' gon bixa' kwa'n gab go; or ro' go ze', kwib go yuo xan xkalyid go, nela tu señ ga', ke lè' bixa' nzè'b xki lo Dios. (Kuze' walika kwa'n nin lo go, más zakzi rë men ze' lo rë men yezh Sodoma kun yezh Gomorra, or gab Dios xmod gak kun kad men yizhyuo.)

¹²Orze' nguro' bixa' par nzhadi'zh bixa' widi'zh che'n Dios lo rë men Israel, par la' rë men ze' rë kwa'n gat lè' nile' bixa' lo Dios. ¹³Orze' ngulo' bixa' nayax mbi mal laxto' rë men, mbaino nayax men nzhakne mitsa' bixa' aseit, par miak rë men ze'.

Ngut Juan xa' nililèi' men le'n nits

(Mt. 14:1-12; Lc. 9:7-9)

¹⁴No mbin rey Herodes rë kwa'n nile' Jesús no rë kwa'n nile' rë men che'n Me, porke rë plo nguxo'b di'zhe, kuze' nguio men nzhab:

—Pas Juan xa' nililèi' men le'n nits, nguruban, no nzhaknu Dios xa' par nile' xa' rë kwa'n nazhon ba'.

¹⁵No zipla men nzhab:

—Li xa' ba'.

Mbaino zipla men nzhab:

—Xa' ba' xa' nak xtu xa' nidi'zh por Dios, xa' nguio nzhala.

¹⁶No or mbin Herodes kwa'n nidi'zh men, orze' nzhab xa':

—¡Juan xa' ba'! ¡Na mile mandad miro'g yek xa', no nal nguruban xa'!

¹⁷Se' midi'zh Herodes, porke mis lè' xa' mile' mandad ngwaga' Juan par mili'b xa' Juan kun kaden, no ngulo xa' Juan lizhyi'b, por ro' Herodías, una' che'n wech xa' Lip, por ngok jwandang che'n Herodes kun lè' una', ¹⁸porke nzhab Juan lo Herodes: “Gat ñalt, banal kun una' che'n wechal”, ¹⁹kuze' xian re' kinu Herodías kun Juan, orze' mikwa'n una' mod par gat Juan, per nangakta' ngut una' Juan, ²⁰porke Herodes nizheb nine Juan, porke nane Herodes dox wen rë kwa'n nile' Juan, mbaino nab tsa par Dios naban Juan. Kuze' nikina xa' Juan par niyent kwan zak Juan. No or mbin Herodes rë kwa'n nidi'zh Juan, orze' net xa' kwan le' xa',

mbaino mizheb xa', per ño laxto' xa' nzhon xa' kwa'n nidi'zh Juan. ²¹Per ngol tu ngubizh, ngwazhël Herodías xmod gut xa' Juan. Or ngol lani che'n Herodes, miza' Herodes kwa'n gao rë men che'n xa', xa' nile' mandad, mbaino rë xa' nile' mandad lo rë sondad, no rë xa' más tsak yezh Galilea. ²²No plo kiyao rë xa' re', nguio xcha'p Herodías no kiyolni' una'. Orze' nguio laxto' Herodes kure', no rë xa' kwa'n nzob lo mes kun lë' xa', orze' nzhab Herodes lo una':

—Bina'b kwa'n nzhaklal lon, na nei.

²³No haxta mize't Herodes Dios, za' xa' wanei kwan na'b una', mbaino haxta za' xa' garol rë kwa'n kinu xa' par lë' una'. ²⁴Orze' nguro' una', nzhab una' lo xna' una':

—¿Kwan na'ba?

Orze' nzhab xa':

—Yek Juan xa' nililëi' men le'n nits nguna'b.

²⁵Orze' lwega' ña ska una' plo nzob Herodes par nzhab una' kure':

—Nzhaklan nal re' tuli, ne' go yek Juan xa' nili'lëi' men le'n nits kan; le'n tu che'.

²⁶Orze' dox miwin laxto' Herodes por Juan, per lë' xa' nzhablai lo Dios, no lo rë xa' ngurezh xa', kuze' nangakt ngab xa': "Gakte." ²⁷Orze' lwega' mile' rey Herodes mandad par nzha tu sondad che'n xa', nzhacho' yek Juan le'n lizhyi'b, ²⁸mbaino ñadnu xa' yek Juan le'n tu chë', miza' xa'i ka' una', no lë' una' miza'i nka' xna' una'. ²⁹Or mbin rë men che'n Juan kure', ngwaka' bixa' kwerp che'n Juan par mika'ch bixa'i.

Miza' Jesús kwa'n ndao gai' mil miyi'

(Mt. 14:13-21; Lc. 9:10-17; Jn. 6:1-14)

³⁰Orze' ñë'd rë apost, men che'n Jesús xa' más nile' mandad, migan bixa' lo Me, no midi'zh bixa' rë kwa'n nazhon kwa'n mile' bixa', no rë kwa'n milu' bixa', ³¹orze' nzhab Me lo rë men che'n Me:

—Guro' go xid rë men ba'; cha' go nzha be plo yent cho nak, par le' go diskans che'p.

Porke dox men nzhin lo bixa', cho ña la, no cho laore nzë; kuze' ni nangak ngao bixa'. ³²Orze' ña Me kun rë men che'n Me le'n tu bark, plo yent cho nak. ³³Per nayax men une nzha Jesús kun rë men che'n Me, no ngwanu laxto' bixa' plo nzha

Jesús. Orze', rë bixa' nzha ni' plo nzha Jesús, no galo bixa' mizhin plo zhin Me kun rë men che'n Me. ³⁴Or ngula Jesús bark, une Me dox nayax men nzhin la, orze' milats laxto' Me rë men ze', porke nzhin bixa' chigab nela rë mbëkxi'l kwa'n yent cho nikina ga'. Orze' nguzublo milu' Jesús nayax kwa'n lo bixa'. ³⁵No nzhazhëlalalyuo, orze' nguzubi rë men che'n Me, nzhab:

—Yent kwa'n nak dan re', no cho or la nal. ³⁶Más ñal guzh go lo rë men ba', bi bixa' lo rë xa' nzho dan mbaino lo rë xa' nzho yezh win, par yazi' bixa' kwa'n gao bixa'.

³⁷Orze' nzhab Jesús:

—¡Biza' go kwa'n gao bixa'!

Orze' nzhab rë men che'n Me:

—¿Taxa nzhakla go yazi' no kwa'n gao bixa', kun dimi kwa'n nile' men gan chop gayo' ngubizh zhi'n?

³⁸Orze' nzhab Jesús:

—Biwi' go pla pan kinu go.

No or milab bixa'i, orze' nzhab bixa':

—Kinu no ga'ytsa pan, no chop mbël.

³⁹Orze' mile' Me mandad, nguzhin tu montón ga' bixa', lo gozh nayë'. ⁴⁰No nguzhin montón bixa', por gayo' bixa', no por cho' bichi' ga' bixa', por montón. ⁴¹Orze' nguzen Me za gai' pan ze' no rop mbël ze', no or miwi' Me lo yibë', no miza' Me xkix lo Dios, orze' michi'x Mei, no miza' Mei ka' rë men che'n Me, par ki'z rë men che'n Mei gao rë men ze'. No se'ga' mile' Me kun rop mbël ze'. ⁴²No rë men ndao haxta plo une ndao bixa'. ⁴³No mikan bixa' rë bilao kwa'n mia'n sobr ndao rë men ze'; michizhë bixa' tu dusen kardor. ⁴⁴No rë men ndao re', nab tsa rë xa' miyi', como gai' mil bixa'.

Jesús nguzë lo nits

(Mt. 14:22-27; Jn. 6:16-21)

⁴⁵No lwega' mile' Jesús mandad, nkë rë men che'n Me le'n bark, par ñaner ga' bixa' xtu ro' nits plo lë Betsaida; no lë' Me mia'n tras par miwi' Me xmod ña rë men ze'. ⁴⁶No or milox ña rë men ze', orze' nzha Jesús le'n mont par nzhana'b Me lo Xuz Me Dios. ⁴⁷No or ngula yë'l, lë' bark nzha la garol sao' nits, no lë' Jesús nzo gak ka lo yuo. ⁴⁸No une Me rë men che'n Me, dox vid kitsë' bixa' bark kun ya' bixa', porke nzo dox mbi no

kichè'l-lo bixa' mbi. No paste las tres or garzi'l, nzhazè Me lo nits plo nzhazè bixa'. No ngokla Jesús, ngazhubner lo bixa'.
⁴⁹Per or une bixa', lè' Jesús nzhazè lo nits, mile' bixa' xigab: “¡Paste tu komale!”, kuze' haxta nguruzhiè bixa',
⁵⁰porke rè bixa' une Jesús, dox mizheb bixa', per lwega' midì'zh Jesús lo bixa', nzhab Me:

—¡Nazhebt go! ¡Ka nai!

⁵¹Orze' nkè Jesús le'n bark, no ngulèz mbi. Orze' rè bixa' xe mia'n tuli por kure'.
⁵²Se' nguzak bixa', porke nagat zobyek bixa' kwa'n mile' Jesús kun rè pan ze'; porke nayao' yek bixa'.

Miliyak Jesús pla men nzhakne yezh Genesaret

(Mt. 14:34-36)

⁵³No or milox nded bixa' le'n nits, orze' mizhin bixa' par lazh men Genesaret, orze' mikido' bixa' bark ro' nits.
⁵⁴no or ngula bixa' bark, lwega' ngokbe' men Jesús,
⁵⁵orze' rè men nzhin naka'n yezh ze', karre ñanu bixa' rè men nzhakne lo ya, plo mbin bixa' mizhin Jesús.
⁵⁶Rè plo ña Jesús, ter yezh ro o yezh win, o haxta rè dan plo nzho men; le'n rè nez ñanu bixa' men nzhakne, no nina'b bixa' lo Jesús ke namás la' Jesús gal bixa' xab Jesús. No rè xa' kwa'n nigale ze', ñak bixa'.

¿Kwan nile', nzhak gat nambet men lo Dios?

(Mt. 15:1-20)

7 ¹Pla men fariseo kun zipla xa' nilu' ley kwa'n mila' Dios lo Muisés, nguzubi bixa' naka'n lo Jesús. Rè xa' re' nzè yezh Jerusalén.
²No une bixa', pla men che'n Jesús kiyao bixa' dub be'd ya' bixa' orze' midì'zh bixa': “Gat ñalte.”
³(Se' mbi'd yek bixa', porke rè men fariseo, nela más rè men Israel xa' más delikad por ley che'n Muisés, dox nabe laxto' bixa'. Chi nazètt xa' ya' xa', nagaot xa', par le' xa' rè kostumbr che'n rè xuz xa', xa' tiemp.
⁴No or ñè'd xa' di lo xbi', nagaot xa' chi nagaz xa' galo, par le' xa' kostumbr che'n bixa'; mbaino más rè kostumbr kwa'n kinu bixa', nela nizèt bixa' rè vas no rè jarr, mbaino rè traxt che'n xa' kwa'n yi'b brons; no haxta lo'n kwa'n nzha' bixa' nizèt bixa'.
⁵Kuze' rè men fariseo kun rè xa' nilu' ley, mina'bdi'zh bixa' lo Jesús:

—¿Chon nzhao rè men che'nal dub be'd ya' bixa', gat nile't bixa' rè kostumbr che'n rè men nzhala?

⁶Orze' nzhab Jesús:

—¡Mbël gox! Walika kwa'n midi'zh Dios por Isaías por go or mizobni' Isaías kure':

Rë men re'; nidi'zh bixa' nazhi' bixa' da,
per niyent kwan nize'n bixa' kun laxto' bixa'.

⁷Yent cho kwent nidi'zh bixa' nazhon Da;

porke rë kwa'n nilu' bixa' por Da, pura che'n mene.

⁸Porke go, tu lad nila' go che'n Dios, namás par nile' go kostumbr che'n men.

⁹No nu nzhab Jesús:

—¡Walika natsin go par nitsinu go che'n Dios namás, par nile' go rë kostumbr che'n go!, ¹⁰porke se' midi'zh Muisés:

“Gop kwent xuzal mbaino xna'l”, no, “Cho xa' ke xuz xa' o

xna' xa', ñal gat xa' ze'.” ¹¹Per go nzhab: “Lë' men gak ka gab lo xuz o lo xna': Nagakt gaknun lu, porke rë kwa'n kinun, lë'i mizala par Dios.” ¹²Kuze' nala't go gaknu men xuz men o xna' men. ¹³Por rë kostumbr che'n go, nile' go natsaktra' widi'zh che'n Dios, no nzho más rë kwa'n, kwa'n nile' go.

¹⁴Orze' ngurezh Jesús rë men, par nzhab Me:

—Bin rë go kure', no bizobyek goi: ¹⁵Gat lë't por kwa'n nzhao men o por kwa'n nzho men, nzhak gat nambe men lo Dios, sino por kwa'n gat lë' nzho laxto' mene. ¹⁶Cho go nzob nzha, bin goi.

¹⁷No or mila' Jesús rë nak men ze', nguio Me le'n yo', orze' nzhab rë men che'n Me lo Me:

—¿Kwan gab widi'zh kwa'n milu' go ba'?

¹⁸Orze' nzhab Me:

—¿Taxa nu go, nagakt zobyek go kure'? ¿Chi gat nanet go, yent cho tu kwa'n nzhao men, nile' ña'n gat nambet men lo Dios?, ¹⁹porke rë kwa'n nzhao men, gat nibite corazón che'n men, sino ke lë'i nibi laxto' men, orze' niro'skai or ña xa' bi'x.

Kure' nzhab Me, par zobyek mene, ke lë' rë kwa'n nzhao men, rëi nambe. ²⁰No nzhab Me:

—Xigab gat lë' kwa'n niro' dizde laxto' men, kure' nile', nzhak gat nambet men lo Dios, ²¹porke laxto' men niro' rë xigab gat lë' re': Rë xigab ban men kun kwaliskier xtu men, rë xigab liwa'n men che'n xtu men, no gut xa' men; ²²mbaino rë xigab zen men una' che'n xtu men, rë xigab gap men kwa'n dimás, rë xigab dox gat lë', rë xigab kide men xtu men, rë

xigab ban men kun tu men xtu men, rë xigab wix men gap men kwa'n kinu xtu men, rë widi'zh nakap nidi'zh men Dios, rë xigab marian, mbaino rë xigab kwa'n yent yek. ²³Rë kwa'n gat lë' re' niro' laxto' men, no por lë'i, ña'n gat nambet men lo Dios.

Tu una' zit mina'b, gaknu Jesús una'

(Mt. 15:21-28)

²⁴Di ze' nguro' Jesús par nzha Me lazh men Tiro mbaino par lazh men Sidón. Orze' nguio Me le'n tu yo' par nanet men Me, per nangakt ngayuka'ch Me. ²⁵Lwega', mbin tu una', lë' Jesús nzho ze'; no una' re' kinu tu më'd una', nzho tu mbi mal laxto' më'd. Orze' mizhin una' lo Jesús, no ngo't kuslo una' lo Jesús. ²⁶No una' re' tlë't men Israel xa', lë' xa' nzë yezh sirofenicia. Dox nguna'b una' lo Jesús par ko' Me mbi mal laxto' xmë'd una', ²⁷orze' nzhab Jesús lo una':

—Bila' gao rë xmë'd Dios galo; porke gat ñalt, kubi men lo mbëk rë kwa'n kiyao rë xmë'd Dios.

²⁸Orze' nzhab una':

—Walika goi Señor, per no ska ño mbëk xan mes plo nzhao rë xmë'd Dios, par gao ma rë biyo ye'n kwa'n nzhab lo yuo.

²⁹Orze' nzhab Jesús:

—Por kwa'n nel re', bizë; nale'tra'l xigab, lë' mbi mal nguro' la laxto' xmë'dal.

³⁰No or nguiubre una' par lizh una', lë' xmë'd una' nax la lo lo'n, no lë' mbi mal nguro' la laxto' më'd.

Miliyak Jesús tu men sord no gat niro'lant kwa'n nidi'zh xa'

³¹Orze' nguro' Jesús lazh men Tiro, no nded Me lazh men Sidón mbaino lazh men Decápolis, par mizhin Me ro' lagún kwa'n ña'n lazh men Galilea. ³²Ze' ñanu pla men tu miyi' sord, no gat nirolant kwaq'n nidi'zh xa'; no kwa'n dox mina'b bixa' lo Jesús, par xo'b Me ya' Me yek miyi' re'. ³³Orze' ngulo' Jesús miyi' re' tu lad xid rë men, par ngulo Me bikwen ya' Me le'n nzha miyi' re', orze' michuk Me par migal Me lo luzh miyi' re' kun nzhuk che'n Me, ³⁴orze' ngulits Me lo Me lo yibë', no mizi' laxto' Me, nzhab Me:

—¡Efata! (Widi'zh re' gab: “Bixa'l”).

³⁵No mis orze', mixa'l nzha xa' no nguruban luzh xa', midi'zh xa' klar laka. ³⁶Orze' mila' Jesús di'zh, yent cho lo gab bixa'i; per ter mile' Jesús mandad, nadi'zht bixa'i, ngont bixa'i, más midi'zh bixa'i. ³⁷Orze' dox xche mia'n kiwi' rë xa' nzhin ze' por kwa'n ngok re', orze' nzhab bixa':

—jRë kwa'n niliyak Jesús! Haxta rë men sord, nzhon kwa'n; mbaino rë men nagakt di'zh, nzhudi'zh xa'.

Miza' Jesús kwa'n ndao tap mil men

(Mt. 15:32-39)

8 ¹Le'n rë ngubizh ze', migan tu béd men xtu wélt, no gat kinut bixa' kwa'n gao bixa'; orze' ngurezh Jesús rë men che'n Me par nzhab Me:

²—Dox nilats laxto'n rë men re', porke nzhalá chon ngubizh nzhin bixa' lon, no gat kinut bixa' kwa'n gao bixa', ³no chi xéla bixa', bi bixa' lizh xa', sin naga gao bixa', nzho rriez gu'zh bixa' nez, porke nzho xa' nzë zit.

⁴Orze' nzhab rë men che'n Me:

—Per, ¿xmod za' met kwa'n nayax gao rë men re', plo niyent kwan nak re'?

⁵Orze' minabdi'zh Jesús pla pan kinu bixa', no nzhab bixa':

—Gazhe.

⁶Orze' mile' Jesús mandad, zob rë men ze' lo yuo, no or nguzen Me za gazh pan, no miza' Me xkix lo Dios, orze' michix Mei no miza' Mei ka' rë men che'n Me par ki'z bixa'i gao rë men ze', no ndi'z bixa'i. ⁷No nu pla mbël win kinu bixa'; xtu wélt miza' Me xkix lo Dios por lë'i, no mile' Me mandad, par ndi'z bixa'i xid rë men ze'. ⁸Rë men ndao haxta plo une ndao bixa', no mikan bixa' rë bilao; gazh kardore. ⁹Rë xa' ndao re', paste como tap mil bixa'. Orze' ngulunez Jesús bixa'. ¹⁰No lwega' nkë Me bark kun rë men che'n Me, par nzha bixa' lazh men Dalmanuta.

Mina'b rë men fariseo, le' Jesús tu kwa'n nazhon por Dios

(Mt. 16:1-4; Lc. 12:54-56)

¹¹Or mizhin bixa' ze', nu pla rë men fariseo migan lo Jesús, par michë'lro' bixa', porke nzhakla bixa', le' Jesús tu kwa'n nazhon kwa'n nzë lo yibë', par zenbe' bixa' Me (wi' bixa' xmod

nak Me), chi Dios ka mixè'l Jesús. ¹²Orze' mizi' laxto' Jesús, no nzhab Me:

—¿Chon nina'b rè men re', ne xa' tu kwa'n nazhon? Per na ni, walika ni tu kwa'n nazhon nanet bixa'.

¹³Orze' mia'n nzhin tsa rè men ze', lè' Jesús nkè bark xtu wèlt, par nzha Me al xtu ro' lagún.

Levadur che'n rè men fariseo

(Mt. 16:5-12)

¹⁴No mia'l laxto' bixa' ngazi' bixa' más pan, namás tutsa pan nzadnu bixa' le'n bark. ¹⁵Orze' nzhab Jesús lo rè men che'n Me:

—Bikina go go lo rè men fariseo, mbaino lo rè men che'n Herodes, kun levadur che'n bixa'.

¹⁶Orze' kidi'zh rè men che'n Me:

—Pas, por gat nzadnu be pan, gao bei.

¹⁷Per ngwanu laxto' Jesús kwan kidi'zh bixa', kuze' nzhab Me:

—¿Chon dox xigab kile' go, por gat nzadnu go pan? ¿Chi nagat zobyek go kwa'n nin re'? ¿Chon stubi nayao' yek go, par ne goi? ¹⁸¿No ter niwi' go, per gat ne goi; no nzob nzha go, per gat gon goi; mbaino nat laxto' go! ¹⁹Or ndi'za gai' pan xid gai' mil men, ¿pla kardor rè kwa'n bilao mikan go?

Orze' nzhab bixa':

—Tu dusene.

²⁰No nzhab Jesús:

—¿No or ndi'za gazh pan xid tap mil men, pla kardor rè kwa'n bilao mikan go?

Orze' mikab bixa':

—Gazhe.

²¹Orze' nzhab Jesús:

—¿Taxa nagat zobyek goi orze'?

Miliyak Jesús tu men nikal lo

²²Orze' mizhin bixa' yezh Betsaida, ze' mizhinnu men tu xa' nikal lo, par nguna'b xa' gal Jesús kwerp che'n xa' nikal lo re'. ²³Orze' nguzen Jesús ya' miyi' re', par ñanu Jesús xa' ro' yezh; orze' michuk Jesús lo xa', no mixo'b Me ya' Me lo xa' re', orze' minabdi'zh Jesús lo xa', nzhab Me:

—¿Chi nilu' la kwa'n lol?

²⁴Orze' ngulits xa' lo xa', no nzhab xa':

—Nilu' la men lon, per nilu' bixa' nela rë ya ñazë ga'.

²⁵Orze' xtu wëlt mixo'b Me ya' Me lo miyi' re', orze' mixa'l lo xa', haxta zit nilu' kwa'n lo xa', klar laka nilu' rë men lo xa'.

²⁶Orze' mixë'l Jesús xa', ña xa' lizh xa', per nzhab Jesús:

—Ni nayubrera'l yezh plo nzhin rë men ba'.

Nzhab Per, lë' Jesús nak Krist

(Mt. 16:13-20; Lc. 9:18-21)

²⁷Orze' nguro' Jesús kun rë men che'n Me, par nzha bixa' rë yezh win kwa'n ña'n lazh men Cesarea Filipino. Dub nzhazë bixa' nez, orze' minabdi'zh Jesús lo rë men che'n Me, nzhab Me:

—¿Cho da, nzhab men?

²⁸Orze' nzhab bixa':

—Nzho xa' nidi'zh, Lu Juan bautist; no más xa' nzhab, Lu Li; no zipla xa' nzhab, Lu nak xtu men midi'zh por Dios, xa' nzhala.

²⁹Orze' nzhab Jesús xtu wëlt:

—Par go ga'; ¿cho da?

Orze' nzhab Per:

—Go nak Krist.

³⁰Orze' mile' Jesús mandad lo rë men che'n Me, yent cho lo gab bixa' cho nak Me.

Jesús midi'zh xmod gat Me

(Mt. 16:21-28; Lc. 9:22-27)

³¹Orze' nguzublo kilu' Jesús lo rë men che'n Me, nzhab Me:

—Na nak Xga'n Dios, no nu nak da tu men yizhyuo; por xigab che'n Dios, nayax men zakzi da. Rë xa' re' nayilat da: Rë xa' nzo lo rë men Israel, kun rë ngulëi' ro, mbaino kun rë xa' nilu' ley kwa'n mila' Dios lo Muisés. No lë' bixa' chi da lo men par gat da. Per ngubizh yon, lë'da ruban.

³²Rë kure' midi'zh Me klar laka, per orze' ngulo' Per Jesús tu lad, nzhab Per:

—¡Nadi'zhtra' go kuba'!

³³Orze' miëk Jesús, niwi' Me lo rë men che'n Me, orze' miyi' Me lo Per, nzhab Me:

—¡Chi lon, Mizhab!, porke gat nile'tal xigab che'n Dios; pura che'n men nzho yekal.

³⁴Orze' ngurezh Me rë men che'n Me, no rë men nzhin ze', par nzhab Me:

—Chi nzho tu go nzhakla yi'dkë ticha, nale't go kwa'n nzhakla go, no bi'y go krus che'n go par di'kë go ticha, ³⁵porke xa' nzhakla kina vid che'n par naloxe, lë'i lox lo Dios; per xa' gat por da o por widi'zh nazhon kwa'n nilun, nayot lox xa' re' lo Dios, ³⁶porke, ¿kwan zu' par tu men, le' xa' gan ter dub yizhyuo, per lo Dios lox xa'? ³⁷No, ¿kwan za' tu men par naloxt xa' lo Dios?, ³⁸porke cho rë men la' da, o la' xa' widi'zh nazhon da, dilant lo rë xa' mia'l laxto' widi'zh che'n Dios, rë xa' gat nzhont ro' Dios; nu ska da la bixa', or yala, kun rë yalnazhon che'n Xuza, no kun rë ganj nazhon che'n Me.

9 ¹No nu nzhab Jesús:

—Walika kwa'n nin, pla xa' nzho xid rë men re', nagatta' bixa' chi naga ne bixa', xmod zhin zhë or luxo'b yalnazhon che'n Dios par le' Me mandad.

Or ngubixlo Jesús

(Mt. 17:1-13; Lc. 9:28-36)

²No nded xo'p ngubizh, nzhanu Jesús nab tsa Per, no Jakob, mbaino Juan, tu lad yek tu yi' ro. No ze' mizhë' lo Jesús. ³No xab Jesús milu' bëo laka no ñaz bële; no per ni tu men yizhyuo nale'ta' gan zët tu lar par ya'ne sa'. ⁴No ze' ngurulo Li, rop xa' kun Muisés, no kidi'zh bixa' kun Jesús. ⁵Orze' nzhab Per:

—¡Maestr, wen dox nzo be re'! ¡Bila' go chao' no chon rranch; tube par go, xtube par Muisés, no xtube par Li!

⁶Porke dox mizheb rë men che'n Jesús re', kuze' net Per kwan di'zh xa'. ⁷Orze' plo nzhin bixa', ngula tu xkao yek bixa', no mien tu widi'zh le'n xkao kwa'n nzhab:

—¡Xa' re' nak Xga'na xa' nazhi' da! ¡Bin go ro' Xa'!

⁸Orze' lwegal miwi' bixa' naka'n, yentra' cho ngane bixa', nab tsa Jesús nzo. ⁹Or ñadla bixa' yek yi', orze' mile' Jesús mandad, yent plo di'zh bixa' kwa'n une bixa', haxta or ruban Me. ¹⁰Orze' ngulu'chao' bixa'i laxto' bixa', no midi'zh bixa' entre lë' bixa', ¿kwan kwa'n ruban menx? ¹¹Orze' minabdi'zh bixa' lo Jesús, nzhab bixa':

—¿Chon nidi'zh rē xa' nilu' ley kwa'n mila' Dios lo Muisés, galo laka Li yi'd?

¹²Orze' nzhab Jesús:

—Walika, lē' Li galo yi'd, no lē' xa' le' yēk rē men lo Dios, mbaino, ¿chon nzobni' lo Yech che'n Dios, lē' Xga'n Dios Me nu nak tu men yizhyuo, kwa'n dox zakzi xa', no nayilat men xa'? ¹³Per na ni lo go, lē' Li mbi'd la, no rē men mile' kwa'n ngokla bixa' kun lē' xa', nela xmod nzobni' ka lo Yech che'n Dios, kwa'n nguzak xa'.

Miliyak Jesús tu mbwin nzho tu mbi mal laxto'

(Mt. 17:14-21; Lc. 9:37-43)

¹⁴No or mizhin bixa' plo nzhin más rē men che'n Me, une Jesús lē' tu bēd men nzhin la naka'n, no kichē'lro' pla rē men nilu' ley kun más rē men che'n Jesús. ¹⁵No or une rē men Jesús, xe mia'n bixa', orze' karre nguzubi bixa' par uni' bixa' lo Jesús, ¹⁶orze' nzhab Jesús:

—¿Kwan kichē'lro' go kun rē xa' ba'?

¹⁷Orze' nzhab tu xa' xid rē men ze':

—Maestr, lē'da nzēdnu xmē'da lol, porke nzho tu mbi mal laxto' mē'd, kwa'n nile' nagakta' di'zh mē'd, ¹⁸porke rē or nizen mbi re' mē'd, haxta niyixkaowe mē'd no nigubiy mē'd; orze' ñax bichi'n ro' mē'd no nidao'lēi mē'd, orze' niyēzh mē'd; no mina'bla da lo rē men che'nal par ngago' bixa' mbi mal re', per nangakta' ngale' bixa'i.

¹⁹Orze' mikab Me, no nzhab Me:

—¡Men xa' gat ñilat Dios! ¿Haxta pok zon kun go par yila go Dios? ¿Haxta pok kek da lo go? ¡Dinu xmē'dalx!

²⁰Orze' mbi'y bixa' mbwin lo Jesús; per or une mbi mal Jesús, orze' mile'i lwegā' mikao mbwin, no ngwachin mbwin lo yuo, orze' maska ñaxyo mbwin, no ñax bichi'n ro' mbwin. ²¹Orze' mina'bdi'zh Jesús lo xuz mbwin:

—¿Plak nzha di nizak mbwin kure'?

Orze' nkab xuz mbwin:

—Dizde win mbwine. ²²No nayax wēlt nigobiy mbwin lo bēl no le'n nits, par nzhaklai gute mbwin; per chi zak le'l tu kwa'n, bilats laxto' go no, no goknu go no.

²³Orze' nzhab Jesús:

—¿Chon nel: “Chi zak le'le”?, porke xa' ñila Dios, ¡rëi gak le' xa'!

²⁴Orze' lweg'a' nguruzhië xuz mbwin, nzhab xa':

—¡Na ñilaka lu; no goknu da, kwa'n nagak yilan!

²⁵No une Jesús, tu béd men nzhazubi karre plo nzo Jesús, orze' nayi' midi'zh Jesús lo mbi mal ze', nzhab Me:

—¡Mbi che'n Mizhab kwa'n nile' nzhak sord men no nagakta' di'zh men, na kile' mandadal, gurutin laxto' mbwin re', no nayëktra'l xtu wëlt lo mbwin!

²⁶Orze' nguru'zhië mbi mal ze', no mile'i mikao mbwin xtu wëlt, no nguzhibe mbwin dox naye, orze' nguro'i; no lë' mbwin mia'n nela tu men ngut ga', haxta rë men nzhin ze' nzhab: “Ngut mbwin.” ²⁷Per Jesús nguzen ya' mbwin, ngoknu Me nguzuli mbwin. ²⁸Or nguio Jesús le'n tu yo', orze' minabdi'zh rë men che'n Me lo nab Me, nzhab bixa':

—¿Chon nangakt ngago' no mbi mal ba', laxto' mbwin ba'?

²⁹Nkab Jesús:

—Rë lo mbi mal kwa'n nak sa', nagakt ro'i chi nana'b men xche lo Dios.

Nzhab Jesús xtu wëlt xmod gat Me

(Mt. 17:22-23; Lc. 9:43-45)

³⁰Or nguro' bixa' ze', nded bixa' par lazh men Galilea; no nanet Jesús, gon rë men plo nzha Me, ³¹porke lë' Me kilu' lo rë men che'n Me kwan zak Me, kuze' nzhab Me:

—Lë'da nak Xga'n Dios no nak da tu men yizhyuo; no lë' rë men zen da par chi bixa' da plo gat da; per ngubizh yon, lë'da ruban.

³²Per lë' rë men che'n Me, nangazobyekt bixa' widi'zh re', no nizheb bixa' nganabdi'zh bixa' kwane.

Milu' Jesús, cho más tsak

(Mt. 18:1-5; Lc. 9:46-48)

³³Or mizhin bixa' yezh Capernaúm, no or nzhin la bixa' le'n yo', nzhab Me lo rë men che'n Me:

—¿Kwan kichë'l ro' go, or nzë be nez?

³⁴Per yent cho ngakab; porke or nzë bixa' nez, mis lë' bixa' kichë'l ro', kidi'zh bixa', nabei cho gak xa' le' mandad xid

bixa'. ³⁵Orze' nguzob Jesús, no ngurezh Me dub tu dusen men che'n Me, orze' nzhab Me:

—Cho go nzhakla, gak xa' nile' mandad; xa' ze' gak xa' lult, no nela tu mos ga' gak xa' xid go.

³⁶Orze' mizo Me tu më'd lo bixa', no nde'zh Me më'd, nzhab Me:

³⁷—Men niwi' wen lo më'd win re' por nak më'd re' men da, gat lë'ta' lo më'de, sino ke lon miwi' xa' wen; mbaino xa' miwi' wen lon, gat lë'ta' lone, sino ke lo Xuza Me mixë'l da, miwi' xa' wen.

Xa' gat niyi' nine be, man che'n be ño xa'

(Lc. 9:49-50; Mt. 10:42)

³⁸Orze' nzhab Juan:

—Maestr, une no tu xa' kigo' mbi mal, kize't xa' lë go. Orze' nzhab no lo xa', nale'tra' xa'i, porke gat lë't men che'n be xa'.

³⁹Orze' nzhab Jesús:

—Bila' go kile' xa'i, porke yent cho tu xa' le' tu zhi'n nazhon por lën, no guzhëla di orze', di'zh xa' gat lë' ticha, ⁴⁰porke xa' gat niyi' nine be, man che'n be ño xa'. ⁴¹No kwaliskier men ne' che'p nits go go, por nak go men da, walika nin, por kuze' lë' Dios za' tu kwa'n wen ka' xa'.

Kwan zak tu xa' le'; la' xtu men Dios

(Mt. 18:6-9; Lc. 17:1-2)

⁴²No nu nzhab Jesús:

—Wanei cho tu xa' le', ya'l laxto' xtu xa' Dios, tu xa' laore ngwayila da; más wen ya xa' le'n nitsdo', xo'b tu ke ro yën xa', nes yachin xa' par gat xa'. ⁴³No chi lë' ya'l nile' nizë'b xkil lo Dios; mejor bicho'i. Más wen gat kinutal rop ya'l, per banal dubta' kun Dios, ke par bil le'n bël, rop lad ya'l, plo ñol bël par dubta', ⁴⁴plo nzhao miyëz men, no gat ñot nzhat ma; ni bël gat ñalt. ⁴⁵No chi lë' ni'l nile' nizë'b xkil lo Dios, más wen bicho'i. Más wen banal dubta' kun Dios kun tutsa ni'l, ke par bil plo gat ñalt bël, kun rop lad ni'l, ⁴⁶plo nzhao miyëz men, no gat ñot nzhat ma; ni bël gat ñalt. ⁴⁷No chi lë' zalol nile' nizë'b xkil lo Dios; más wen gulo'i, mbaino yol plo nile' Dios mandad kun tutsa zalol, ke par bil kun rop zalol plo ñol bël par dubta', ⁴⁸plo

nzhao miyëz men, no gat ñot nzhat ma; ni bël gat ñalt, ⁴⁹porke lè' Dios xè'l bël xid rë men, nela nigo men zed lo kwa'n gao men ga'. ⁵⁰Lè' zed nizu'; per chi gat nazhi'y, yentra' kwan zu'i. Gok wen go nela zed ga', par kwìn go wen, tu go kun xtu go.

Milu' Jesús, or nilè' men kun tsa' men

(Mt. 19:1-12; Lc. 16:18)

10 ¹Orze' nguro' Jesús yezh Capernaúm, nzha Me lazh men Judea, xtu ro' you' Jordán. No ze', xtu wëlt, migan tu béd men lo Jesús, no nguzublo Jesús, milu' Me widi'zh che'n Dios lo bixa' xtu wëlt, nela xmod nile' ka Me. ²Orze' nguzubi pla men fariseo minabdi'zh bixa' lo Jesús par zenbe' bixa' Me (wi' bixa' xmod nak Me), nzhab bixa':

—¿Chi zak lè' tu miyi' kun tsa' xa', lo ley kwa'n mila' Dios lo Muisés?

³Orze' nzhab Jesús:

—¿Kwan mizobni' Muisés lo ley por kuba'?

⁴Orze' nzhab bixa':

—Lè' Muisés mizobni'; chi tu miyi' lè' kun tsa', orze' gaxxao' tu yech par yanu una', par gak la' miyi' una'.

⁵Per nzhab Jesús:

—Sa' mizobni' Muisés por dox nakap go, ⁶per dizde or mizuxkwa' Dios yizhyuo, se' nzobni': “Dios ngulo miyi' no una'.” ⁷No nu nzobni': “Por una', lè' miyi' la' xuz no xna', ⁸par ban xa' tutsa kun tsa' xa'.”

No nu nzhab Jesús:

—No gat lè'tra' chop xa', lè' xa' ngok tutsa men. ⁹Kuze', miyi' xa' mizo Dios tsa', nagaktra' lè' xa' kun tsa' xa'.

¹⁰No or ña la rë bixa' le'n yo', orze' mina'bdi'zh rë men che'n Jesús por kwa'n midi'zh Me re', ¹¹orze' nzhab Me:

—Wanei cho la' nzè'b una' che'n, no ban xa' kun xtu una', nzè'b xki xa' lo Dios por kure'. ¹²No chi lè' una' la' tsa', no ban xa' kun xtu miyi', nzè'b xki ska xa' lo Dios por kure'.

Una'b Jesús lo Dios por rë mè'd

(Mt. 19:13-15; Lc. 18:15-17)

¹³Orze' nzhanu men pla mè'd lo Jesús, par na'b Me lo Dios por lè' bimè'd; orze' ngala't rë men che'n Me. ¹⁴Per or une Jesús kure', miyi' Me, orze' nzhab Me:

—Bila' go zubi më'd lon, naka'nt go lo bimë'd, porke rë men nak nela rë më'd, xa' ze' yo plo nile' Dios mandad. ¹⁵No walika kwa'n nin, xa' nagak nela tu më'd ga', nagakt yo xa' plo nile' Dios mandad.

¹⁶Orze' nde'zh Me rë më'd, no mixo'b Me ya' Me yek bimë'd, par miza' Me yalnazhon che'n Me ka' bimë'd.

Tu miyi' xi, dox rrik
(Mt. 19:16-30; Lc. 18:18-30)

¹⁷Or mer nzharo' Jesús nez par nzha Me xtu plo, karre mizhin tu miyi' xi, nguzuxib lo Jesús, mbaino minabdi'zh miyi' re':

—Maestr wen, ¿kwan naki'n len par gapa yalnaban dubta' lo Dios? —nzhab miyi'.

¹⁸Orze' nzhab Jesús:

—¿Chon nel, wen da? Yent cho wen, nab tsa Dios wen.

¹⁹Lu nane la rë ley che'n Dios: “Nagutal men, nabantal kun una' che'n men, no naliwa'ntal, nakë'tal kixu' men, no nakidetel men par ka'l che'n xa'; mbaino gop kwent xuzal mbaino xna'l.”

²⁰Orze' nzhab miyi' xi re':

—Maestr, rë kure' kilen, dizde win da.

²¹Orze' miwi' Jesús lo miyi', michizhi' Me miyi', mbaino nzhab Me:

—Xtutsa kwa'n jwalt le'l: Bito rë nak kwa'n kinul, orze' biza'i, ka' rë men xa' yent kwan nzhap, nes par gapal rë kwa'n dox tsak lo yibë'; orze' di'kë ticha.

²²Or mbin miyi' re' kure', xe mia'n xa' tuli di miwin laxto' xa', orze' dox nalats ña xa', porke dox kwa'n nzhap xa', ²³mbaino miwi' Jesús naka'n lo rë men che'n Me; no nzhab Me:



**Nguna'b Jesús lo Dios por
rë më'd (Mr. 10:16)**

—¡Tatu nagan yo tu rrik plo nile' Dios mandad!

²⁴Or mbin bixa' widi'zh re', xe mia'n rë men che'n Me tuli, no nzhab Jesús xtu wëlt:

—Bin goi xga'n, ¡tatu nagan yo tu rrik plo nile' Dios mandad! ²⁵Más jwals ded tu kamey xan tu yaguj, ke par yo tu rrik plo nile' Dios mandad.

²⁶Or mbin bixa' kure', más mia'n xe bixa', orze' nzhab bixa' lo wech bixa':

—Chi lë'i sa', ¡pas yent cho men gak ro' lo rë kwa'n nazhe'b kwa'n nzëdkë tich men! —nzhab bixa'.

²⁷Orze' xe miwi' Jesús lo bixa', no nzhab Me:

—Par rë men, nzho kwa'n nagakt le' men; per Dios, yent cho tu kwa'n nagak le' Dios.

²⁸Orze' nguzublo nzhab Per:

—Biwi' go, no mila' rë kwa'n, par nzadkë no tich go.

²⁹Nkab Jesús:

—Walika kwa'n nin lo go, rë xa' la' lizh, o wech xa', o bizan xa', o xuz xa' o xna' xa', o xmë'd xa', o yuo che'n xa', por ñila xa' da; ³⁰per rë kwa'n mila' xa', xtu gayo' wëlt máse gap xa' mis yizhyuo re'; mbaino nu yi' men ne men xa' por da; no xtu yizhyuo kwa'n laore yi'd, lë' xa' ban par dubta'. ³¹Per nayax xa' galo nal re', gak xa' lult laka; no xa' lult laka nal re', gak xa' galo laka.

Mion wëlt midi'zh Jesús, lë' Me gat

(Mt. 20:17-19; Lc. 18:31-34)

³²Or nzha Jesús nez kun rë men che'n Me par yezh Jerusalén, nzhubner Me lo bixa'; orze' xe mia'n rë men che'n Me niwi' bixa' lo Me; mbaino nu rë men se'ga, dub nizheb bixa' nzadkë bixa' tich rë men che'n Me. Orze' ngurezh Jesús za tu dusen men che'n Me tu lad, nguzublo kidi'zh Me lo bixa' kwan zak Me, ³³nzhab Me:

—Biwi'u, lë' be nzha yezh Jerusalén plo zen bixa' da, par chi bixa' da lo rë ngulë'i ro, no lo rë xa' nilu' ley; no lë' rë xa' re' gab, ñal gat da; orze' chi bixa' da lo rë men gat lë't men Israel par gut rë men re' da, ³⁴mbaino xizhnu bixa' da, chuk bixa' lon, no kin bixa' da; orze' gut bixa' da, per ngubizh yon, lë'da ruban.

Kwa'n mina'b Jakob no Juan

(Mt. 20:20-28)

³⁵Orze' nguzubi Jakob kun Juan xga'n Zebedeo lo Jesús, par nzhab bixa':

—Maestr, nzhakla no, le' go tu kwa'n na'b no lo go.

³⁶Nkab Jesús:

—¿Kwan nzhakla go len por go?

³⁷Orze' nzhab bixa':

—Or gak go rey, gap go rë kwa'n, ziyël go zob tuga' no, kad ta' go.

³⁸Per nzhab Jesús:

—Nanet go kwan kina'b go. ¿Chi zo go kwa'n nala kwa'n go'n, no chi xek go ne go kwa'n nazhe'b kwa'n zak da?

³⁹Orze' nkab bixa':

—Lë' no xek ka loi.

Per nzhab Jesús:

—Lë' go go ka kwa'n nala kwa'n go'n; mbaino lë' go zakka kwa'n nazhe'b kwa'n zak da, ⁴⁰per par zob tuga' go ta'n, nagakta' nene; nab tsa Xuza kobe' (wi') cho zob kad ta'n.

⁴¹Or mbin za chi' men che'n Jesús kure', orze' niyi' bixa' lo Jakob no lo Juan, ⁴²per ngurezh Jesús za chi' bixa' re' par nzhab Me:

—Nane ka go xmod nak rë xa' nile' mandad xid rë men gat lë't men Israel, dox naye nikë rë xa' re' men zhi'n; mbaino rë xa' ro xid rë men ba', mod nzhakla xa' nilinu xa' rë men. ⁴³Per go, nagakt go sa'; men kwa'n nzhakla le' mandad xid go, xa' ze' gak nela tu mos ga' lo go, ⁴⁴no xa' nzhakla gak xa' tsak xid go, xa' ze' gak xa' le' mandad che'n más go; ⁴⁵lë'la na, nak da Xga'n Dios mbaino nak da tu men yizhyuo; gat nzhalta par len mandad lo rë men; lë'da nzhal par len mandad che'n bixa', mbaino gat da por nayax men yizhyuo par ban bixa'.

Jesús miliyak tu men nikal lo

(Mt. 20:29-34; Lc. 18:35-43)

⁴⁶Or mizhin bixa' yezh Jeriko no or nzharo' la Jesús yezh ze' kun rë men che'n Me, mbaino kun nayax men se'ga nzhakë tich Me, no ro' nez ze' nzob tu xa' nikal lo lë Bartimeo, xga'n tu xa' lë Timeo, kina'b xa' gon. ⁴⁷Or mbin xa' nikal lo re', lë'

Jesús nzë yezh Nazaret nzhaded ze', nguzublo kibizhië xa' re', naye nzhab xa':

—¡Jesús, Xga'n Dabi, bilats laxto' da!

⁴⁸Orze' nzhab rë men: “¡Kiex, nakuzhiëtra!!”, per más nayë nguruzhië xa', nzhab xa':

—¡Xga'n Dabi, bilats laxto' da!

⁴⁹Lë'chi ngulëz Jesús, mbaino nzhab Me:

—Waka' go xa' ba'.

Orze' nzhab rë men lo xa' nikal lo re':

—¡Nazhebtal, watso; lë' Jesús kibezhal!

⁵⁰Orze' xa' nikal lo re', ngulubi xa' lar kwa'n nzho'b tich xa', nayan laka ngwatso xa', mizhin xa' lo Jesús, ⁵¹no minabdi'zh Jesús lo xa', nzhab Me:

—¿Kwan nzhaklal len pur lu?

Mikab xa' nikal lo re':

—Maestr, nzhaklan yani lon.

⁵²Orze' nzhab Jesús:

—Bizë, guzhë ngwani lol por ngwayilal da.

No mis orze', tuli ngwani lo xa' re', orze' nzhakë xa' tich Jesús.

Nguio Jesús Jerusalén nela tu rey ga'

(Mt. 21:1-11; Lc. 19:28-40; Jn. 12:12-19)

11 ¹Dub nzhazhin Jesús yezh Jerusalén, nzhaded la Me ro' xchop yezh win kwa'n nzhin ze'; tube lë Betfagé, no xtube lë Betania, gax lom plo lë Olivos; orze' mixë'l Me chop men che'n Me, ²nzhab Me:

—Wa go yezh win kwa'n nilu' ba', lë' go zhin plo nikido' tu burrit kwa'n gat zob ni tu men; bixëk go ma no dí'nu go ma, ³no chi cho ne lo go: “¿Plo wei' go burrit ba'?”, orze' gab go: “Lë' Señor naki'n ma, per lwegá' yi'dla' no ma.”

⁴Orze' ngwa bixa', no une bixa' burrit nikido' le'n nez ro' tu pwert, no mixëk bixa' ma. ⁵Ze' nzo pla men, xa' nzhab:

—¿Chon kixëk go burrit ba'?

⁶Orze' nzhab rë men che'n Jesús nela xmod nzhab ka Jesús lo bixa', kuze' mila' rë xa' re'. ⁷Orze' ñano bixa' burrit re' lo Jesús, mbaino mixo'b bixa' xab bixa' tich ma no nguzob Jesús ma. ⁸No dox men ndix xab dilant plo ded Jesús, no nzho bixa' ndix rram la kwa'n micho' bixa' dan,


⁹no xa' nzha dilant, no rē xa' nzē tras, naye kibizhiē bixa',
nzhab bixa':

¡Bidi'zh go wen nzha xa' mixē'l Dios!

¹⁰¡Wen nzha xa' nzē ben che'n xuz be Dabi par le'
mandad lo be!

¡Bidi'zh go nazhon Dios, Me nzho lo yibē!

¹¹No or nguio Jesús yezh Jerusalén, ngwa Me yado'; no or
miwi' Me rē plo, une Me rē kwa'n nzhak ze', orze' nzha Me
kun dub tu dusen men che'n Me par yezh Betania, porke ya
cho gor la.



Yado' ro che'n rē men Israel or miban Jesús (Mr. 11:11)

**Jesús mizhi'bde tu ya nzhao' por niyent nzhao' loi
(Mt. 21:18-19)**

¹²No xtu riyē'l, or nguro' bixa' yezh Betania, orze' mbi'd
nila'n Jesús, ¹³no zitra', une Jesús tu ya nzhao' nayē', no
ngwatswi' Me, nabei chi nzo nzhao' loi; no or mizhin Me
xan ya, yent kwan nak loi, nab lai, porke gat lē't tiemp
kwa'n niza'i orze'. ¹⁴Kuze' mizhi'bde Jesús ya nzhao' ze',
nzhab Me:

—Ya nayotra' yi'd men, gao men nzhao' che'nal.
No kiyon rē men che'n Mei.

Jesús ngulo'tin rē xa' kile'xbi' lo luwe che'n yado'

(Mt. 21:12-17; Lc. 19:45-48; Jn. 2:13-22)

¹⁵Or nguio bixa' yezh Jerusalén, mizhin Jesús lo luwe che'n yado'; orze' nguzublo kigo'tin Me rē xa' kile'xbi' no rē xa' kwa'n kizi' ze', mbaino michixche Me rē mes che'n rē xa' nich'i' dimi che'n men, no plo nito men palom, no michixche Me plo nizob bixa'. ¹⁶No nangala'tra' Jesús ngaded men kun kwa'n lo luwe ze'. ¹⁷Orze' nguzublo kilu' Me lo rē men nzhin ze', nzhab Me:

—¿Chi nanet go, se' nzobni' lo Yech che'n Dios: “Lizha yi'd rē nak men yizhyuo, par yi'di'zh bixa' lon”? ¡Per go kile'i nela plo nibin rē wa'n ga'!

¹⁸No or mbin rē ngulēi' ro kure', kun rē xa' nilu' ley, orze' mikwa'n bixa' mod par gut bixa' Jesús, porke or nilu' Me widi'zh che'n Dios, rē men ña'n xe. Kuze' nizheb bixa' nine bixa' Me. ¹⁹No or nzhalá yē'l, nguro' Jesús kun rē men che'n Me, yezh Jerusalén.

Ya nzhao' mibizh

(Mt. 21:20-22)

²⁰No xtu riyē'l ze', or garzi'l; dub nzha bixa' nez, une bixa', lē' ya nzhao' ze' mibizh la, dub luce. ²¹No Per mitsila or mizhi'bde Jesús ya ze', kuze' nzhab Per:

—Maestr, lē' ya nzhao' kwa'n mizhi'bde go ze', ¡mibizhe biwi'ule!

²²Orze' nkab Jesús:

—Kuze' la nin, wayila go Dios. ²³Walika kwa'n nin, wanei cho men gab lo yi' ba': “Chi ba', bizē le'n nitsdo'”, no nale't xa' chop xigab or gab xa'i, sino yila xa' rē kwa'n gab xa', orze' lē'i gak, lē' Dios le'i. ²⁴Kuze' kinin, rē kwa'n na'b go lo Dios, wayila goi, lē'i gap go; lē'i zhin lo go. ²⁵No or kina'b go lo Dios, biya'l laxto' go rē kwa'n nile' men lo go, nes par lē' Xuz go, Me nzho lo yibē', ya'l laxto' Me rē kwa'n nzē'b xki go lo Me. ²⁶Per chi naya'l laxto' go rē kwa'n nile' men lo go, nu ska Xuz go, Me nzho lo yibē', naya'lt laxto' Me rē kwa'n nzē'b xki go lo Me.

Minabdi'zh bixa', cho mile' mandad Jesús

(Mt. 21:23-27; Lc. 20:1-8)

²⁷Orze' nguiubre Jesús xtu wēlt yezh Jerusalén kun rē men che'n Me. No or nzo Me lo luwe che'n yado', lē'chi nguzubi rē

ngulëi' ro lo Me, kun rë xa' nilu' ley, mbaino kun rë xa' nak zhi'n yezh, ²⁸par nzhab bixa':

—¿Cho mile' mandadal kile'l rë kure', o cho mixë'lal par le'le?

²⁹Orze' nkab Jesús:

—Nuska da nabdi'zh tu kwa'n lo go; no chi lë' go nei, orze' ganin cho mile' mandad da kilen rë kure'. ³⁰Nal bine go, ¿cho mixë'l Juan, xa' mili'lëi' men le'n nits? ¿Chi Diose, o mene?

³¹Orze' kidi'zh bixa' entre lë' bixa':

—Chi gab be: “Diose”, orze' lë' xa' ne lo be: “¿Chon ska nangayila go xa'?” ³²No por rë men, nazhe'b be par be, kuze' nagakt gab be: “Men mixë'l Juan”.

Porke rë men nidi'zh, walika Dios mixë'l Juan, ³³kuze', se' mikab bixa' lo Jesús:

—Nanet no choi.

Orze' nzhab ska Jesús:

—Nuska da nanita, cho mixë'l da, kilen rë kure'.

Kwent che'n pla mos nakap

(Mt. 21:33-46; Lc. 20:9-19)

12 ¹Orze' nguzublo kidi'zh Jesús kun pura kwent lo rë men, nzhab Me:

—Nguio tu miyi', ngo'n ya gub lo yuo che'n; orze' mitsao' xa' naka'n ro' yuo che'n xa', mbaino mizuxkwa' xa' tu plo tsi' xa' gub che'n xa', no nu mizuxkwa' xa' tu plo ya par kina xa'i. Orze' miza' xa'i med par ga'n xtu mene, mbaino nguro' xa' lazh xa', nzha xa' che'p. ²Or ngol tiemp za'i, mixë'l xa' nak che'n yuo ze' tu mos, par na'b mos lo xa' ngo'ne, kwa'n ñal gal xa'. ³Per rë xa' ngo'n loi ze', lë'la migal bixa' mos, no ndin xa' mos, mbaino se'tsa mixë'l bixa' mos. ⁴Orze' mixë'l xa' ze' xtu mos, per ngulëi' bixa' yek mos re', no ngokla ngwa midi'zh bixa' lo mos. ⁵Orze' mixë'l xa' ze' xtu mos, per mbit bixa' mos re'. Orze' mixë'l xa' más mos, per nzho mos ndin bixa' mbaino mbit bixa'.

⁶No xa' nak che'n yuo re', nab tsa xga'n xa' kinu xa', miyi' nazhi' xa'; orze' nzhab xa': “Lë'da xë'l tugaka xga'na kwa'n kinun re'; ro' xa' re'se, gon bixa'.” ⁷Per rë xa' kwa'n ngo'n yuo re', or une bixa' miyi' re', nzhab bixa' lo wech bixa': “Xa' re' xa' ya'nu rë kure', cha'o gut bixa', par ya'nu be rë che'n xa'.”

⁸Orze' nguzen bixa' xga'n xa' ze', mbit bixa' miyi', mbaino zit ngulubi bixa' miyi' re'.

⁹No nu nzhab Jesús:

—Nal, ¿kwa'n le' xa' nak che'n yuo ze'? Lè' xa' yè'd par lo'x xa' rē men nakap kwa'n ngo'n yuo che'n xa', no lè' xa' za'i ga'n xtu ben men. ¹⁰Taxa, ¿nanet go kwa'n nzobni' lo Yech che'n Dios?:

Lè' ke kwa'n ngulubi rē xa' nichao' yo',
lè'i ngok ke galo laka kwa'n nzen dub yo'.

¹¹Kure' mile' Dios, par tuli xe mia'n rē men.

¹²Orze' ngokla bixa' ngazen bixa' Jesús par ngayo Me lizhyi'b, porke mizi bixa', par yek bixa' nzha widi'zh re'. Per mizheb bixa' por rē men nzhin ze', orze' ña bixa'.

Jesús midi'zh por kwa'n nzhas lo gubier César

(Mt. 22:15-22; Lc. 20:20-26)

¹³Orze' mixè'l bixa' pla men fariseo lo Jesús par zenbe' bixa' Me (wi' bixa' xmod nak Me), no pla men che'n Herodes, par nabei chi zab Jesús tu kwa'n gat ñal, par gak kè' bixa' kixu' Jesús. ¹⁴Orze' mizhin rē men re', nzhab bixa':

—Maestr, nane no, go nidi'zh pura kwa'n wali, gat ñot go man che'n ni tu men, no nali nidi'zh go xmod ñal ban men lo Dios. Bine go lo no, lo ley che'n be, ¿chi lè'ka kix be kwa'n nina'b César, o gat lè'te? ¿Chi ñal za' bei, o gat ñalte?

¹⁵Per lè' Jesús nane la, ka kina'bdi'zh bixa'i, kuze' nzhab Me:

—¿Chon kizenbe' go da? Ka ta go tu pes le.

¹⁶No miza' bixa'i, orze' nzhab Jesús:

—¿Cho nikè lo pes re', mbaino cho lè nikè loi?

Orze' nzhab bixa':

—César nikè loi.

¹⁷Orze' nzhab Jesús:

—Ñal za' go che'n César kwa'n nak che'n César, no za' go che'n Dios kwa'n nak che'n Dios.

Orze' xe mia'n bixa' tuli por kwa'n nzhab Me.

Midi'zh Jesús xmod ruban men

(Mt. 22:23-33; Lc. 20:27-40)

¹⁸Orze' nguzubi pla men saduceo lo Jesús, xa' nidi'zh: “Gat walit nzho xtu vid”, orze' minabdi'zh bixa' kure':

¹⁹—Maestr, Muisés mizobni' lo ley: “Chi tu miyi' kinu una' mbaino gat xa' sin nangap xa' më'd kun læ' una', orze' læ' wech xa' naki'n ban kun læ' una', par gap wech xa' tu më'd por kwent che'n xa' ngut re'.” ²⁰Mbaino nguio tu xa' ngop gazh wech; xa' galo ngok tsa' tu una' per ngut xa' sin nangap xa' më'd; ²¹orze' xa' mirop miban kun læ' una', per ngut ska xa', se'ga' nangapt ska xa' më'd. No kun xa' mion, se'ska. ²²Kun za gazh xa' miban una' re', no kun ni tu xa' nangapta' xa' më'd, mbaino rë xa' ngut. Lult, nu una' ngut. ²³No or ruban bixa' xtu wëlt, di lo rë xa', ¿cho xa' ya'n kun læ' una'?, porke za gazh xa' miban kun læ' una'.

²⁴Orze' nkab Jesús:

—Ñagan go por nane go kwa'n nzobni' lo Yech che'n Dios, no ni yalnazhon che'n Dios nanet go, ²⁵porke or ruban men, yentra' cho ban kun una', no ni yentra' cho gak jwandang che'n; læ' bixa' gak nela rë ganj che'n Dios ga'. ²⁶No por rë men ngut xa' ruban, taxa, ¿nanet go widi'zh kwa'n mizobni' Muisés lo yech, or mize't xa' tu ya yich zobyol? Dios nzhab lo Muisés: “Na nak Dios che'n Abraham, no Dios che'n Isaac, mbaino Dios che'n Jakob.” ²⁷Kuze' nane be, Dios re', gat læ't Dios che'n men ngute, sino læ' Me Dios che'n men naban. ¿Chi nagat zobyekt go kure'?

Xid rë kwa'n mizobni' Muisés, ¿cho kwa'n galo naki'n le' men?
(Mt. 22:34-40)

²⁸Orze' nguzubi tu xa' nilu' ley, plo nzo Jesús. Or mbin xa' xmod midi'zh Jesús lo rë men ze', porke une xa', dox wen mikab Jesús; kuze' minabdi'zh xa':

—Xid rë kwa'n mizobni' Muisés, ¿cho kwa'n galo naki'n le' men?

²⁹Orze' nkab Jesús, nzhab Me:

—Kure' galo laka naki'n le'l, men Israel: “Bine: tutsa Señor Dios che'nal nzho. ³⁰Bichizhi' Señor Dios che'nal kun dub laxto'l, no kun dub lal, no kun rë xigab che'nal, mbaino kun rë jwers che'nal.” ³¹No kwa'n rop xid rë kwa'n nzobni' nak kure': “Bichizhi' xtu men nela lu ga'.” Yentra' xtu kwa'n mile' Dios mandad, más kwa'ro lo rop kure'.

³²Orze' nzhab xa' nilu' ley ze' lo Jesús:

—Dox wen kwa'n nel ba', maestr; walika, tutsa Dios, no yentra' xtu Dios más lo Dios re'. ³³No kwa'n chizhi' men kun

dub laxto' men Dios, no kun rë xigab che'n men, mbaino kun rë jwers; no chizhi' men xtu men nela lè'ka xa', más tsake lo rë kwa'n zak men chigab walika nazhon par men, mbaino kun más rë gon niza' men lo Dios.

³⁴Or une Jesús, lè' xa' re' mikab nela xmod ñale, orze' nzhab Jesús:

—Gat zitra' nzol par yol plo nile' Dios mandad.

No dizde orze', ya ni yentra' cho ngaye laxto', ngana'bdi'zh más kwa'n lo Me.

¿Plo nzë Krist?

(Mt. 22:41-46; Lc. 20:41-44)

³⁵Dub kilu' Jesús widi'zh che'n Dios lo luwe che'n yado', lè'chi nzhab Me:

—¿Chon nidi'zh rë xa' nilu' ley, lè' Krist nak xga'n Dabi?

³⁶Mbaino mis Dabi nzhab por Sprit che'n Dios:

Lè' Señor nzhab lo Xa' nile' mandad da:

“Guzob lad direch da, haxta or len,
che'ptsa gak rë xa' nidilal xan ni'.”

³⁷Nal, ¿xmod nak lè' Krist nak xga'n Dabi?, porke mis Dabi nzhab: “Xa' re', Me nile' mandad da.” ¿Chon ska, nake xga'n Dabi?

No tu béd men kwa'n nzhin ze', ño laxto' bixa' xmod kidi'zh Jesús.

Midi'zh Jesús, xmod nak rë xa' nilu' ley

(Mt. 23:1-36; Lc. 11:37-54; 20:45-47)

³⁸No dub kilu' Jesús widi'zh che'n Dios, nzhab Me:

—Bikina go go lo rë xa' kwa'n nilu' ley, lè' bixa' ño laxto' nzhak bixa' lar no'; mbaino ño laxto' bixa', nini' men lo bixa' dub lo xbi'.

³⁹Mbaino ño laxto' bixa' zob galo laka bixa' plo nizob rë xa' ro, le'n yo' plo nitse'd men widi'zh che'n Dios; no nu plo nzhak tu lani galo laka bixa'. ⁴⁰Mbaino niliwa'n bixa' che'n rë una' ngut xmiyi'; no par gab men, menaye bixa', xche nina'b bixa' lo Dios. Kuze', más nazhe'b kwa'n zak bixa' or gab Dios xmod gak kun kad men yizhyuo.

Tu una' ngut xmiyi', miza' gon

(Lc. 21:1-4)

⁴¹Orze' nguzob Jesús dilant plo ñuchao' rë gon; xe kiwi' Me xmod kila rë men ze' gon, no tu béd men rrik kila nayax dimi.

⁴²Lë'chi mizhin tu una' ngut xmiyi', no prob xa'; orze' le'n ze' mila una' chop dimi kwa'n natsakt be's, ⁴³orze' ngurezh Jesús rë men che'n Me, nzhab Me:

—Walika nin, una' prob kwa'n ngut xmiyi' re', par Dios, más nayaxe miza' una' ke rë xa' rrik ba'; ⁴⁴rë xa' rrik ba' miza' kwa'n mia'n sobr lo bixa', per una' re', dub lo yalprob che'n xa', rë tsa dimi kwa'n kinu xa' par gao xa', miza' xa'.

Midi'zh Jesús, lë' yado' bil

(Mt. 24:1-2; Lc. 21:5-6)

13 ¹No or nzharo' Jesús lo luwe che'n yado', orze' nzhab tu rë men che'n Me:

—Maestr, biwi' go tatu kwa'ro yado' re'; no tatu nazhe'b rë ke nzho ta'i.

²Per nzhab Jesús:

—¿Chi niwi'l dox kwa'roi? Per zhin zhë ni tu ke che'ne naya'nte tich weche; rëi bil.

Señ kwa'n gak lo yibë', or nzhazhin lox yizhyuo

(Mt. 24:3-28; Lc. 21:7-24; 17:22-24)

³Orze' nzha Me yek lom kwa'n lë Olivos, ze' nilu' laka yado', orze' nguzob Me, no za dap rë xa' re' mina'bdi'zh lo Me: Per kun Jakob no Juan mbaino Ndres; nzhab bixa':

⁴—Bine go lo no, ¿pok gak rë kure', no xmod lu' or nzhazhin la rë kure'?

⁵Orze' nguzublo kidi'zh Jesús, nzhab Me:

—Bikina go go, par yent cho kide go, ⁶porke dox men di'zh: “Na nak Krist”, no dox men kide bixa'.

⁷No or gon go, laba'i-lare'i kidil men, nayat laxto' go; rë kure' gak galo laka, per stubi nilë'ra' lox yizhyuo. ⁸Lë' tu gubier dil kun xtu gubier, no tu yezh kun xtu yezh; mbaino rë plo win xo, no yo yalwin. Kure' galo laka yalzi kwa'n zublo zak rë men yizhyuo.

⁹Per bikina go go, lë' rë men zen go no chi bixa' go lo rë gustis, no kin bixa' go le'n rë yo' plo nitse'd men widi'zh che'n Dios; mbaino wei' bixa' go lo rë gobier no lo rë rey por nak go men da; kure' gak par di'zh go cho da lo bixa'. ¹⁰No antis di lox yizhyuo, naki'n re'ch widi'zh nazhon che'n Dios lo rë ben men yizhyuo. ¹¹Or zen bixa' go par wei' bixa' go lo rë xa' nile'

mandad ze', no nale't go xigab xmod kab go lo bixa'; lè' Sprit che'n Dios di'zh por go. ¹²No lè' men chi mis wech men par gat wech xa', mbaino xuz men mis lè' xa' chi rè xin xa', no rè xin xa' chi xuz xa' par mis lè' bixa' le' gat rè melizh bixa'. ¹³Sa' li'nu nayax men go por nak go men da, per xa' xek lo rè kure', xa' ze' ban bid nazhon kwa'n niza' Dios.

¹⁴'No or ne go, yo tu kwa'n dox gat nambet plo nzho yalnazhon che'n Dios (xa' go'l kure', lè' xa' zobyeke), orze' rè men nzho lazh men Judea, lè' bixa' yuka'ch dan; ¹⁵no rè men nzo yek yo', naza'tra' la bixa' par ko' bixa' rè che'n bixa'; ¹⁶mbaino xa' nzo dan, naza'tra' yubre xa' ni par yaka' xa' xab xa'. ¹⁷No zhè ze', jzhe'b nalats nzha rè una' nak xin, mbaino rè una' naka' mè'd! ¹⁸Bina'b go lo Dios, par zhè zhin rè kure' nagakte rè mbëo' nayag. ¹⁹Dub di mizuxkwa' Dios yizhyuo, lalta', nagat zakzi men nela zak bixa' rè zhè ze', nab tsa orze'i; no ni nayo ra' ne men xtu kwa'n nela kwa'n yi'd ze'. ²⁰No chi xche di' rè kure', yent cho men yizhyuo ya'n naban, rè' xa' lox; per por nazhi' Dios rè men xa' ngule Me, la'ta' Dios di' rè kure' xche.

²¹'No chi cho ne lo go: “jBiwi', lè' Krist nzo re!”, o “jBiwi', lè' Krist nzo ba!”, nayilat goi, ²²lè' nayax men yo di'zh: “Na nak Krist”, mbaino yo nayax men gab lo men: “Na nidizh por Dios”, no le' bixa' rè señ nazhon par kide bixa' rè men; no nzho rriez kide bixa' nu rè men ngule Dios gak men che'n Dios. ²³Kuze' bikina go go; lè'da ni la rè kure' lo go nes par nzhon la goi.

Or yi'd Krist xtu wëlt yizhyuo

(Mt. 24:29-35, 42-44; Lc. 21:25-36)

²⁴No nzhab Jesús:

—Le'n rè ngubizh ze', or lox rè yalzi kwa'n nzho yizhyuo, orze' lo ngubizh kao, no lo mbëo' nayanitra', ²⁵mbaino gab rè mbël lo yibè'; no nu bil rè kwa'n nzen kwa'n nzho lo yibè'. ²⁶Orze' rè men ne, yala le'n xkao kun rè ganj che'n Xuza, mbaino kun rè yalnazhon da. ²⁷No xëla rè ganj che'n Xuza par kan rè men da xa' ngulen dap lad yizhyuo, dizde tu ro' yizhyuo haxta xtu ro' yizhyuo.

²⁸'Biwi' go xmod nak ya nzhao'; or nixiche, orze' nane go, lè' biyiu nzhazhin la. ²⁹Se'ga' or ne go, kiyak rè kwa'n nazhe'b

re'; nane la go, lë'da nzhazhin la yal. ³⁰Walika kwa'n kinin, or zublo gak rë kure', rë men yizhyuo xa' mia'n naban orze', se'gaka naban bixa' or lox gak rë kure'. ³¹Yibë' no yizhyuo, lë'i lox; per rë widi'zh kwa'n kinin re', nadedte, rëi gak. ³²Per zhë ze', or zhin gak rë kure', yent cho nanei; ni rë ganj kwa'n nzho lo yibë', mbaino ni na; nab tsa Xuza Dios nanei. ³³Kuze' biwi' go kwan le' go, no gok natsin go; porke nanet go or zhin rë kure'. ³⁴Rë kure' nak nela tu miyi' nguro' nzha lazh men. Antis di ya xa', mila' xa' tuga' rë mos che'n xa' par kina rë che'n xa', mbaino mika'b xa' lo tu rë mos re' kina ro' pwert. ³⁵No go nak nela rë mos re', bikina go; porke nanet go cho or yë'd xa' nak che'n yo' re', chi mizhë'lalyuoi, o garol yë'le, o or nikë' nguid gay kante, o garzi'le; ³⁶nes par or yala de rrepent, yent kwan ya laxto' go. ³⁷No kwa'n nin lo go re', gat lë't par nab go nzhai, sino par rë men yizhyuoi; ;gok natsin go!

Mia'n bixa' di'zh xmod zen bixa' Jesús

(Mt. 26:1-5; Lc. 22:1-2; Jn. 11:45-53)

14 ¹Nzhak jwalt xchop ngubizh par gal lani Pask, zhë nzhao men pan kwa'n yent levadur. Lë' rë ngulëi' ro kun rë xa' nilu' ley, kikwa'n bixa' mod zen bixa' Jesús xla'n, par gut bixa' Me, ²mbaino kidi'zh bixa':

—Nale't bei zhë lani, par nayent kwan le' rë men.

Tu una' michob aseit nax yek Jesús

(Mt. 26:6-13; Jn. 12:1-8)

³No or nzo Jesús yezh Betania, ngwatao Me lizh Simón xa' lë “Lepros”. Or nzob Jesús lo mes, mizhin tu una' kun tu bot win kwa'n nakxao' kun ke ónice, dox tsake; viv aseit nardo nzho le'ne. Orze' ngulë' una' kwa'n nzho aseit re', michob una'i yek Jesús. ⁴Per pla xa' nzhin ze', nangayot laxto' bixa'i, nzhab bixa' lo wech bixa':

—¿Chon mitsinu una' re' aseit ba'? ⁵Ngak ngado aseit ba' kwa'n tsak chi' mbëo' kë men zhi'n che'n men, par ngaga'z dimi ze', ngaka' rë men yent kwan nzhap.

Kuze', ndil bixa' una' ze'. ⁶Orze' nzhab Jesús:

—La' go, nadilt go una' re'; ¿chon kikixian go xa'?, porke dox wen tu kwa'n mile' xa' por da; ⁷rë men prob, zilita' yo bixa' xid go, gak gaknu go bixa' or nzhakla go; per na gat

lè'ta' dubta' zon kun go. ⁸Mbaino una' re', mile' kwa'n ngok mile' xa'; michob xa' aseit nax da, nes par or ga'ch da mile' la xa'i. ⁹No walika kwa'n nin; rë plo re'ch widi'zh nazhon che'n Dios, nu ka kwa'n mile' una' re' yët, par tsila bixa' una'.

Judas mito Jesús

(Mt. 26:14-16; Lc. 22:3-6)

¹⁰Orze', lè' Judas Iscariote, xa' nzho xid za tu dusen men che'n Jesús, ngwa xa' lo rë ngulèi' ro, par chi xa' Jesús lo rë xa' re'. ¹¹Or mbin bixa' kure', dox nizak laxto' bixa', no nzhab bixa', za' bixa' dimi ka' Judas. No dizde orze', nguzublo kikwa'n Judas mod, kiwi' xa' cho or za'i, par gak chi xa' Jesús.

Lult yë'l kwa'n ndao Jesús kun rë men che'n Me

(Mt. 26:17-29; Lc. 22:7-23; Jn. 13:21-30; I Co. 11:23-26)

¹²Mer ngubizh galo che'n lani pask, or nzhao men Israel pan kwa'n niyent levadur, zhë ze' niza' men Israel tu gon lo Dios, or nzhut bixa' tu mbëkxi'l. Orze' mina'bdi'zh rë men che'n Jesús, nzhab bixa':

—¿Plo nzhakla go yachao' no kwa'n gao be nal yë'l re', lani Pask re'?

¹³Orze' mixë'l Me chop men che'n Me, nzhab Me:

—Wa go le'n yezh; ba' ne go tu miyi' ñanu tu re' nits, no wakë go tich xa'. ¹⁴Mbaino plo zhin xa', guzh go lo xa' nak lizhe ze': “Lè' Maestr ne lol: ¿Plo nak yo' kwa'n ne'l, par gao kun rë men da, lani Pask re'?” ¹⁵Orze' lè' xa' lu' tu yo' nzob yek al ya, naxene, no nazuxkwa' la le'ne; ze' bizuxkwa' go kwa'n gao be.

¹⁶Orze' nzha rop men che'n Jesús par yezh; no rëi ngok nela xmod nzhab ka Jesús lo bixa'; ze' michao' bixa' kwa'n gao bixa' lani Pask. ¹⁷No or ngula yë'l, mizhin Jesús ze', kun dub tu dusen men che'n Me. ¹⁸No dub kiyao bixa' lo mes, nzhab Jesús:

—Walika kwa'n nin, mis tu rë go kiyao kuda re', chi da lo rë men par gut bixa' da.

¹⁹No rë bixa' miwin laxto', orze' nguzublo minabdi'zh tuga' bixa' lo Jesús, nzhab bixa':

—¿Taxa le' go xigab nai?

²⁰Orze' nzhab Jesús lo bixa':

—Mis tu rē xa' nzho xid tu dusen goi, xa' kwa'n kigazh pan le'n plat dai. ²¹Na Xga'n Dios no nu tu men yizhyuo da; lē'da zak rē kwa'n nzobni' lo Yech che'n Dios, ꝑer nazhe'b nalats nzha miyi' xa' chi da lo rē men! Más wen nangayot ngal xa' re'.

²²No dub kiyao bixa', nguzen Me pan, miza' Me xkix lo Dios, no michix Mei, miza' Mei ka' rē men che'n Me, orze' nzhab Me: —Mbai go, kure' nak kwerp da.

²³No nguzen Me tu vas nits gub, miza' Me xkix lo Dios, orze' miza' Mei ka' rē men che'n Me, rē bixa' ngu'y, ²⁴mbaino nzhab Me:

—Kure' nak ren da kwa'n xon, par ya'n nayax men nambe lo Dios. ²⁵Walika kwa'n nin, nago'tra' nits gub yizhyuo re'. Or go'ne xtu wēlt plo nile' Dios mandad, xa'la mode.

Nzhab Jesús, lē' Per gab, gat nili'be't Per Me

(Mt. 26:30-35; Lc. 22:31-34; Jn. 13:36-38)

²⁶No or milox mikē' bixa' tu kant lo Dios, nguro' bixa' nzha bixa' yek lom kwa'n lē Olivos, ²⁷orze' nzhab Me lo bixa':

—Rē go la' nzē'b da, porke se' nzobni' lo Yech che'n Dios: “Lē'da gut miyi' nikina mbēkxi'l, orze' lē' rē ma re'ch.” ²⁸Per or ruban da, lazh men Galilea kwēza yi'd go.

²⁹Orze' nzhab Per:

—Ter rē xa' re' la' nzē'b go; per na, nalat go.

³⁰Per nzhab Jesús:

—Walika kwa'n nin, nal yē'l re', ni naga kē' nguid gai kant chop wēlt, lē'l gab chon wēlt gat nili'be'tal da.

³¹Per garga'l nzhab Per:

—ꝑPer na nalat go ter nu da gat kun go!

No se'ska nzhab rē bixa'.

Jesús mina'b lo Dios, plo lē Getsemaní

(Mt. 26:36-46; Lc. 22:39-46)

³²Orze' ngwa bixa' tu plo lē Getsemaní, ze' nzhab Jesús lo rē men che'n Me:

—Riga guzob go, lē'da nzhana'b lo Dios.

³³Orze' nzhanu Me Per, no Jakob, mbaino Juan; orze' nguzublo niyentra' jwers Me por tanta nizheb Me, haxta netra' Me kwan le' Me, ³⁴no orze' nzhab Me lo yon xa' re':

—Nzho tu yalnawin dox laxto'n, ya naxektra' da; biya'n go re' no bikina go; naga't go.

³⁵Orze' nguzè Jesús xche'p dilant; ze' ngo't kuslo Me lo yuo, no mina'b Me lo Dios, chi lè'i gak le' Dios, nazhint rë kwa'n zak Me orze'. ³⁶Or kina'b Me lo Dios, nzhab Me:

—Payè!, par go, rëi gak le' go. ¿Chi zak kubchi go da lo rë kwa'n nzè par da? Per gat lè't kwa'n nin, kuze' gak; sino kwa'n ne goi.

³⁷Orze' mièk Me plo nzhin yon men che'n Me ze'; no mizhin Me, lè' yon xa' nax la. Orze' nzhab Me lo Per:

—Simón, ¿chi naxnal? Nangaxektal ni tu or, ngakinal.

³⁸Bikina go no guna'b go lo Dios, par nayachin go lo che'n Mizhab. Le'n laxto' go nzhakla ka go che'n Dios, per kwerp che'n go gat nzhaklat che'n Dios.

³⁹Orze' ngwa Jesús xtu wèlt, par ngwana'b Me lo Xuz Me Dios, mis kwa'n nzhab la Me. ⁴⁰Or mièk Me xtu wèlt, lè' bixa' nax la, porke dox nzè mika'l lo bixa'; orze' net bixa' xmod kab bixa' lo Jesús. ⁴¹No wèlt mion nzhab Me:

—¿Stubi nax go, kile' go diskans? Porke xa' chi da, ngox la nka'. Biwi' go, lè' or mizhin la, lè' Xga'n Dios Me nu nak tu men yizhyuo, yo ya' rë xa' nzè'b xki lo Dios. ⁴²Waxche go, cha'o, ro' be re'; biwi' go, lè' xa' chi da nzè la ba'.

Ngwaga' Jesús

(Mt. 26:47-56; Lc. 22:47-53; Jn. 18:2-11)

⁴³Mis orze', stubi kidi'zh Jesús; lè'chi mizhin Judas, mis tu xa' nak tu dusen men che'n Me, kun tu béd men, nzho bixa' nzen spad mbaino yarro. Rë xa' re' mixè'l rë ngulèi' ro, kun rë xa' nilu' ley, mbaino rë men Israel xa' nak zhi'n. ⁴⁴No xa' le' entreg Jesús, nzhab xa' tu señ le' xa': “Xa' kwa'n chiro'n ta' kwats, xa' ze' guzen go no bi'y go xa'; no neo, nale' xa' gan.” ⁴⁵Or mizhin Judas lo Jesús, lwegá' nguzubi xa', nzhab xa':

—¿Ma go Maestr?

Orze' michiro' xa' ta' kwats Jesús, ⁴⁶mbaino nguzubi rë men par nguzen bixa' Jesús. ⁴⁷Orze' xtu rë xa' nzo ze', kun spad micho' xa' tu nzha mos che'n ngulèi' ro, ⁴⁸orze' midid'zh Jesús lo rë men ze':

—¿Chon nzè go kun spad mbaino kun yarro? ¿Chigab tu men wa'n nzatsen go? ⁴⁹Zilita' nguzon xid go le'n yado', plo

nidi'zha widi'zh che'n Dios; no nangazent go da. Per rë kure' nzhak par gak rë kwa'n nzobni' lo Yech che'n Dios.

⁵⁰Orze', rë men che'n Jesús mikë' karre, mia'n nab tsa Me. ⁵¹Per tu miyi' xi nzhakë tich Jesús, narël xa' nab tsa tu sab, per nu xa' nguzen men, ⁵²per nguro'tin xa' ya' men, mia'ntsa sab che'n xa' ya' rë men ze', kache' xa' mile' xa' gan.

**Mizhin Jesús lo rë gustis che'n men Israel,
xa' más nile' mandad**

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³Orze' mbi'y bixa' Jesús lo ngulëi' ro; no ze' nzhin más ngulëi' kwa'n nile' mandad lo más ngulëi', kun rë men Israel xa' nak zhi'n, mbaino rë xa' nilu' ley kwa'n mila' Dios lo Muisés. ⁵⁴Per lë' Per ngwakë zit tich Jesús, haxta lo luwe che'n ngulëi' ro mizhin Per. Ze' nguzob Per xid rë xa' nikina



**Mbi'y bixa' Jesús lo yub ngulei' ro
che'n men Israel (Mr. 14:53)**

yado', kibizh bixa' junt lo ki. ⁵⁵No rë ngulëi' ro, mbaino kun más rë gustis xa' más nile' mandad, kikwa'n bixa' cho men gab, nak Jesús tu kwa'n ñal gat Me, par gut bixa' Jesús; per yent kwan ngane bixa', nak Jesús. ⁵⁶No nayax men midi'zh

kwa'n nak Jesús, per pura nikë bixa' di'zh, tu xa' kun xtu xa'.
⁵⁷No nzho xa' mikë' mbël nzhab:

⁵⁸—Mbin no midi'zh xa': “Na chil yado' kwa'n michao' men, mbaino chontsa ngubizh kuxkwa'n xtube, per gat lë't kwa'n nichao' ya' mene.”

⁵⁹Per ni kwa'n nzhab xa' re', gat nakte tutsa kun rë kwa'n nidi'zh más bixa'. ⁶⁰Orze' nguzuli ngulëi' ro, par nguzo xa' sao' rë men ze', orze' minabdi'zh xa' lo Jesús:

—¿Chon nanel kabal? ¿Kwan kine rë xa' re' nakal?

⁶¹Per yent kwan ngakab Jesús. Orze' minabdi'zh ngulëi' ro xtu wëlt, nzhab xa':

—¿Chi lu nak Krist, Xga'n Dios Me nidi'zh rë men nazhon?

⁶²Orze' nzhab Jesús:

—Nai. No rë go ne, lë' Xga'n Dios, Me nu nak tu men yizhyuo; lë' Me zob lad direch che'n Dios Me nile' rëi; no yë'd Me le'n xkao lo yibë'.

⁶³Orze' michëz ngulëi' ro lar kwa'n nzho'b tich xa', nela tu señ ga' ke lë' Jesús midi'zh tu kwa'n gat lë' lo Dios. Orze' nzhab xa':

—¿Kwan ra' gakla be, ne men, xtu kwa'n nak xa' re'? ⁶⁴Rë go mbin, midi'zh xa' di'zh gat lë' lo Dios. ¿Kwan nile'u xigab ñal xa'?

No rë bixa', tutsa midi'zh bixa', ke ñal gat Jesús. ⁶⁵No nzho bixa' nguzublo michuk lo Jesús; no mitsao' bixa' lo Jesús kun tu lar, no mikë' bixa' puñet yek Jesús, orze' nzhab bixa':

—¿Bine cho mikë'i yekal!

No nu rë xa' nikina yado', mixa't bixa'i ta'ro' Jesús.

Lë' Per nzhab: “Gat nili'be'ta' Jesús”

(Mt. 26:69-75; Lc. 22:56-62; Jn. 18:15-18, 25-29)

⁶⁶No lë' Per nzob al yët lo luwe, lë'chi mizhin tu una' nikë zhi'n che'n ngulëi' ro, ⁶⁷no or une una' lë' Per kibizh, xe miwi' una', nzhab una':

—Nuka lu, niki'zë kun Jesús Nazareno.

⁶⁸Orze' nzhab Per:

—¡A'a! ¡Ni nanen kwan kidi'zhal!

Orze' nguro' Per ro' yo' al tich. (No lwegaa' mikë' tu nguid gai kant.) ⁶⁹No or une kriad Per xtu wëlt, nguzublo nzhab una' xid rë men nzhin ze':

—¡Nuka xa' re!, tu xa' nikizë kun lë' bixa'!

⁷⁰Per xtu wëlt nzhab Per: “Nalibe'ta' xa' ba'”, no uzhe'la ze', rë xa' nzhin ze' nzhab bixa' lo Per:

—¡Sigur nukal nikizël kun lë' bixa', porke lu nzë lazh men Galilea!

⁷¹Orze' nguzublo kize't Per Dios, nzhab Per:

—¡Dios zakzi da chi lë'da ka kini rë kure'!

⁷²Lë'chi mis orze', mikë' nguid gai kant xtu wëlt. Orze' mitsila Per kwa'n nzhab Jesús: “Antis di kë' nguid gai kant chop wëlt, lë'l gab chon wëlt: Gat nili'be'ta' xa' ba'.” Orze' dox mbi'n Per.

Mbi'y bixa' Jesús lo Pilat

(Mt. 27:1-2, 11-14; Lc. 23:1-5; Jn. 18:28-38)

15 ¹No riyë'l, garzi'l laka migan rë ngulëi' xa' nile' mandad lo más ngulëi', no kun rë men Israel xa' nak zhi'n, mbaino kun rë xa' nilu' ley, no kun más rë gustis xa' más nile' mandad; rë xa' re' tutsa midi'zh bixa'. Orze' mili'b bixa' Jesús par mbi'y bixa' Me lo Pilat. ²Orze' minabdi'zh Pilat lo Jesús, nzhab xa':

—¿Chi lu nak rey lo rë men Israel?

Orze' nzhab Jesús:

—Go nei.

³No rë ngulëi' xa' nile' mandad lo más ngulëi', por dox kixu' kikë' bixa' Jesús, ⁴kuze' xtu wëlt minabdi'zh Pilat, nzhab xa' lo Jesús:

—¿Chon nanel kabal ni tu kwa'n? Biwi!, dox kwa'n ne bixa' nakal.

⁵Per yent kwan ngakab Jesús, kuze' haxta net Pilat, xmod le' xa'.

Jesús o Barrabás

(Mt. 27:15-31; Lc. 23:13-25; Jn. 18:38–19:16)

⁶No or nzhal lani Pask, kinu Pilat kostumbr, niliya' xa' tu men nzho lizhyi'b, dike cho men gakla rë men ro' lizhyi'b. ⁷No tu miyi' lë Barrabás nzho lizhyi'b orze', kun zipla xa' mbit men kun lë' xa', or ngok tu dil kun gubier César. ⁸Orze' mizhin rë men lo Pilat, nguna'b bixa', ziyël Pilat ko' xa' tu men nela xmod nile' ka xa'. ⁹orze' nzhab Pilat:

—¿Chi nzhakla go liyan xa' nak rey che'n rë men Israel?

¹⁰Porke ngwanu laxto' Pilat, lë' rë ngulëi' ro xa' nile' mandad, michi Jesús por mbidios bixa'. ¹¹Per lë' rë ngulëi' xa' nile' mandad ze', más mile' bixa' par nzhab rë men, liya' Pilat Barrabás mejor. ¹²Orze' minabdi'zh Pilat:

—¿Nal, kwan nzhakla go len kun xa' kwa'n nzhab go nak rey lo rë men Israel?

¹³Orze' nzhab rë men, kibizhië bixa':

—¡Bikë' xa' lo krus!

¹⁴Orze' nzhab Pilat:

—¿Per kwan tu kwa'n nazhe'b mile' xa' re'?

Per rë men, xtu wëlt nguruzhië bixa':

—¡Bikë' xa' lo krus!

¹⁵No par ya'n Pilat wen kun rë men, miliya' xa' Barrabás, no dispwes di mile' xa' mandad ndin bixa' Jesús, orze' michi xa' Jesús lo men par kë' bixa' Jesús lo krus. ¹⁶Orze' lë' rë sondad mbily Jesús lo luwe plo nzob palas, kwa'n lë 'pretorio.' Ze' migan pas como xo'p gayo' sondad román. ¹⁷No mila bixa' tu lar naxne yën Jesús, nela che'n tu rey ga'. Orze' mizuxkwa' bixa' tu koron yich, par mizob bixa'i yek Jesús, ¹⁸orze' nguzublo nibizhyë bixa', nzhab bixa':

—¡Wen nzha rey che'n rë men Israel!

¹⁹Orze' mixa't bixa' ya yek Jesús, no michuk bixa' lo Me, mbaino nguzuxib bixa' par mile' bixa' nela nile' men kun tu rey ga' lo Me. ²⁰No or milox mixizhnu bixa' Jesús, orze' ngulo' bixa' lar naxne ze' yën Me, orze' migak ska bixa' xab ka Me, orze' ngulo' bixa' Jesús par kë' bixa' Jesús lo krus.

Or nkë Jesús lo krus

(Mt. 27:32-44; Lc. 23:26-43; Jn. 19:17-27)

²¹No tu miyi' lë Simón, xa' nzë yezh Cirene, xa' nak xuz Lejandr no Ruf; ñë'd xa' di dan. Or nded xa' ze', orze' mile' rë sondad, mbily xa' krus che'n Jesús. ²²Orze' nzhanu bixa' Jesús plo lë Gólgota (Widi'zh re' gab, Yek Men Ngut). ²³No nzhakla bixa' ngaza' bixa' vin kwa'n noch mirra, par go' Jesús, per nangot Mei. ²⁴Orze' mikë' bixa' Jesús lo krus, orze' nguzhit bixa' di swert, par ne bixa', cho ya'n kun xab Jesús, no kwan le' kad bixa'. ²⁵Pas como las nueve garzi'l,

mikë' bixa' Jesús lo krus. ²⁶No mikë' bixa' tu letr por kwan ngut Jesús, kwa'n nzhab se': "Xa' re' rey che'n rë men Israel."

²⁷No nu chop wa'n mikë' bixa' lo krus orze'; tu xa' lad direch, no xtu xa' lad izkierd che'n Jesús, ²⁸par ngok tu widi'zh kwa'n nzobni' lo Yech che'n Dios kwa'n nzhab se': "No nu xa' nguio kwent, xid rë xa' kwa'n nzë'b xki lo Dios."

²⁹No rë men nided ze', nidi'zh bixa' kwa'n gat lë', nikwin bixa' yek bixa', nzhab bixa':

—¡Taxa! ¡Lu kwa'n nidi'zh, chilal yado'; no chontsa ngubizh, kuxkwa'le! ³⁰¡Gula lo krus ba'; no mis lu, la'tal gatal!

³¹Se'ska nzhab rë ngulëi' xa' nile' mandad, kun rë xa' nilu' ley kwa'n mila' Dios lo Muisés, mixizhnu bixa' Jesús; kidi'zh bixa' lo wech bixa':

—Nayax men miliyak xa'; per kun lë' xa', nangale't xa'.

³²Chi lë' xa' walika nak Krist, no rey lo rë men Israel; ¡nzhakla no la xa' yub xa' lo krus, par ne noi, orze' yayila no xa'!

No haxta rop xa' nikë lo krus kun lë' Jesús, midi'zh bixa' gat lë' lo Me.

Or ngut Jesús

(Mt. 27:45-56; Lc. 23:44-49; Jn. 19:28-30)

³³No or ngol garol ngubizh, dub yizhyuo mikao haxta las tres guzhe, ³⁴no mis orze', midi'zh Jesús naye:

—¡Eloi, Eloi!, ¿lama sabactani? (Widi'zh re' gab: ¡Dios da, Dios da!, ¿chon mila' nzë'b go da?)

³⁵No pla rë men nzhin ze' mbin widi'zh re'; nzhab bixa': "Bin go, lë' xa' kibezh Li, tu xa' mixë'l Dios nzhala." ³⁶Orze' karre ngwa tu xa', migazh tlë' sponj le'n vin nala; orze' mili'b xa'i yek tu ya, no michi xa'i ro' Jesús par ngo Mei, orze' nzhab xa':

—Bila' go, nabei chi ziyi'd Li, par la xa' lo krus.

³⁷Per orze' naye nguru'zhië Jesús, no mizi'la Me; ngut Me, ³⁸lë'chi ngurëz lar kwa'n nayao' le'n yado' plo dox nazhon; chop lë' ngoke tuli, dizde al ya haxta al yët. ³⁹No une capitán che'n rë sondad, xa' nzo gax lo Jesús, xmod ngut Jesús, orze' nzhab xa':

—Walika, Xga'n Dios miyi' re'.

⁴⁰No nu ska pla rë una' kwa'n nzhin zit ze', une rë kure'. Xid rë una' re' nzo Mari Madalén, mbaino xtu Mari xna' Jakob xa' más xi, no xna' Che; no xtu una' lë Salomé. ⁴¹Rë una' re',

or stubi nzo Jesús Galilea, ngwakë bixa' tich Me, no mile' bixa' mandad che'n Jesús; no nu más rë una' nzhin ze', xa' kwa'n ngwakë tich Jesús par yezh Jerusalén.

Or miga'ch Jesús

(Mt. 27:57-61; Lc. 23:50-56; Jn. 19:38-42)

⁴²No or ngwa'z ngubizh zhë Vier, nguzublo zhë bispr che'n sabd, zhë kwa'n nayi' kë men Israel zhi'n, ⁴³orze' tu miyi' lë Che, xa' n zë yezh Arimatea, no nak xa' tu xa' nak zhi'n xid rë gustis xa' más nile' mandad che'n men Israel, no nu miyi' re' kimbëz yo plo nile' Dios mandad; xa' re' mile' rriez, ngwa lo Pilat, par nguna'b xa' kwerp che'n Jesús. ⁴⁴Orze' xe mia'n Pilat or mbin xa', lë' Jesús ngut la; orze' ngurezh xa' capitán che'n rë sondad kwa'n mikë' Jesús lo krus, par minabdi'zh xa', nabei chi walika ngut la Jesús. ⁴⁵Or mbin xa': "Walikai", nzhab capitán, orze' miza' xa' kwerp che'n Jesús wei' Che. ⁴⁶Orze' nguzi' Che tu lar yex; no or milox mila xa' kwerp lo krus, orze' michël xa' lar yex kwerp che'n Jesús, ngwaka'ch xa'i le'n tu ba' kwa'n nade'n la le'n pura ke; no mitsao' xa' ro'i kun tu ke ro. ⁴⁷No Mari Madalen kun xtu Mari xna' Che, une bixa' plo miga'ch kwerp che'n Jesús.

Jesús nguruban

(Mt. 28:1-10; Lc. 24:1-12; Jn. 20:1-10)

16 ¹Or nded zhë sabd ze', lë' Mari Madalen mbaino xtu Mari xna' Jakob, kun una' lë Salomé; ngwazi' bixa' aseit nax par chob bixa'i kwerp che'n Jesús. ²No primer zhë che'n sman, garzi'l laka laore ngulen laka ngubizh, nzha rë una' re' ro' ba'. ³Dub nzha bixa' nez, nzhab tu una' lo xtu una': —¿Cho gaknu be par kubchi ke, ro' ba' se?

⁴Per or nzhazhin la bixa' gax, lë'chi une bixa', lë' ke ze' nax la tu lad. No dox kwa'ro ke ze'. ⁵Or nguio bixa' le'n ba', une bixa' tu miyi' xi nak tu lar bëo laka, nzob lad derech; orze' dox mizhe'b biuna', ⁶orze' nzhab miyi' xi re':

—Nazhebt go. ¿Chi Jesús Nazareno, Me nkë lo krus, kikwa'n go? Yentra' Me re', lë' Me nguruban la. Biwi' go plo nguxo'b Me. ⁷Per nal bizë go, no wayab goi lo rë men che'n Me, mbaino lo Per; lë' Me kimbëz la lazh che'n men Galilea; ze' ne go Me, nela xmod mila' ka Me di'zh.

⁸Orze' nguro' rë una' ze' karre le'n ba', porke dox mizheb bixa' haxta nixiz bixa'; per yent cho lo ngab bixa'i nez, porke dox mizheb bixa'.

Ngurulo Jesús lo Mari Madalen

(Jn. 20:11-18)

⁹No dispwes di nguruban Jesús garzi'l laka ngubizh galo che'n sman, orze' ngurulo Me galo laka lo Mari Madalen, una' kwa'n ngulo' Jesús gagh mbi mal laxto'. ¹⁰Orze' lë' una' ngwayabe lo rë men che'n Jesús, porke dox niwin laxto' bixa'. ¹¹No or mbin bixa', lë' Jesús nguruban, no lë' una' re' une Me; per net bixa' ngayila bixa'i.

Jesús ngurulo lo xchop men che'n

(Lc. 24:13-35)

¹²Dispwés di kure', ngurulo Jesús xtu mod lo xchop men che'n Me, or nzo bixa' dan. ¹³Orze', rop xa' re' ngwayabe lo más bixa', per nangayilatska rë xa' ze'i.

Jesús ngurulo lo za chi' bitub men che'n

(Mt. 28:16-20; Lc. 24:36-49; Jn. 20:19-23)

¹⁴Lult laka ngurulo Jesús lo za chi' bitub men che'n Me or nzob bixa' lo mes; orze' ndil Jesús bixa' por gat ñila bixa'i, por tanta nad bixa', nangayilat bixa' rë kwa'n nzhab, rë xa' une nguruban Me. ¹⁵Orze' nzhab Jesús:

—Wa go dub yizhyuo, par wadi'zh go kwa'n nazhon che'n Dios re', lo kwantsa men. ¹⁶Xa' yila da no gaklëi' xa', lë' xa' gal vid nazhon kwa'n niza' Dios; per xa' nayila da, lë' Dios zakzi xa'. ¹⁷No rë señ re' le' rë xa' ñila da: Por lën, kutin xa' mbi mal; di'zh xa' xtu ben di'zh kwa'n za' Dios ka' men; ¹⁸no ter zen xa' mbë'l, o go xa' tu kwa'n nile' nzhat men, per yent kwa'n zak bixa'; no or xo'b bixa' ya' bixa' yek rë men nzhakne, lë' rë men ze' yak.

Jesús ña lo yibë'

(Lc. 24:50-53)

¹⁹No or milox nzhab Me rë kure', orze' nkili Me lo yibë' par nguzob Me lad derech che'n Xuz Me Dios. ²⁰No rë men che'n Me, nguro' bixa' rë plo, par ngwadi'zh bixa' widi'zh nazhon

che'n Dios por Jesukrist. No lë' Me ngoknu bixa' por rë señ
nazon kwa'n mile' Me por lë' bixa'.